



# WANTOK

Niuspepa Bilong Yumi Ol PNG Stret!

Namba 1836

Wan Wik, Oktoba 15 - 21, 2009

K1 tasol long olgeta hap



## INSAIT

bemobile

**Painim Bal Resis!!**

Winim K100 na Bemobile Gift beg insait!!

Lukim nupela

**STORI WANTAIM WANTOK Pes 19**

**Midia i glasim Klaimet Senis - P3**

*Insait..*

"Sapotim Belisi na Rekonsilien, Rausim ol Gan na kamapim Sevis na Developmen insait long Bogenvil!"



**24 pes**

**Bogenvil Saplimen Insait!**

# Madang solwara bisnis senta bai go het: Kulit

Paul Zuvani i raitim

**VIDAR ples, 30 kilomita i go long Not Kos Rot bilong Madang Provins i graun bilong gavman.**

Gavman i gat rait long wokim wanem samting em i laikim.

Pasifik Marin Industriyel Son (PMIZ) we gavman i redi long kamapim long Vidar bai kamap.

Dispela em tok bilong Sekreteri bilong Tred na Industri Anton Kulit, taim Wantok Niuspepa i ringim em long Madang long bekim tok bilong ol pipel long Bel, Madang Lagun husat i no laikim dispela solwara bisnis senta i kamap long hap bilong ol.

Kulit i tok dispela senta i projek bilong gavman na olsem ol pipel i nogat rait long pasim.

"Dispela em graun bilong gavman. Ol pipel i nogat rait long pasim gavman long mekim wok.

"Projek bai go het olsem gavman i makim long em," Mista Kulit i tok.

Em i tok em i redi long tok-tok wantaim ol pipel long ol arapela samting we gavman i no bin toktok long em.

Ol samting olsem en-vironmen na ol liklik bisnis we ol pipel i no save dispela em bai toktok wantaim ol.

Tude ol pipel long Madang Lagun wantaim sapot bilong Madang Pipel's Grup bai bung wantaim Dipatmen bilong Tred na Industri long Madang Provinsel Gavman Opis na autim wari bilong ol. Ol pipel i bin laik kamapim



**SORITUMAS:** Kulit i tok Vidar graun i bilong gavman na PMIZ bai go het.

protes mas tasol Polis Komisina Gari Baki i tok nogat long dispela.

Long dispela as ol bai

mekim protes bung tasol wantaim Kulit na ol opisa bilong Dipatmen.

Ol pipel i raitim pas long Gavana bilong Madang Se Arnold Amet, Presiden bilong Divain Wod Yunivesiti Pater Jan Czuba na Madang Provinsel Polis Komanda Anthony Wagambie Junia long kisim sapot bilong ol.

Askim bilong ol pipel long Dipatmen na Gavman em:

- GAVMAN i mas pasim dispela Pasifik Merin Industriyel Son long dispela taim inap long olgeta tok orait i kamap pastaim;
- GAVMAN mas mekim sampela awenes kempen long ol pipel long sait

bilong bagarap i kamap en-vironmen bilong ol; bus, graun, solwara na ol samting i stap insait long solwara;

- LONG sait bilong wok bisnis gavman i mas tok klia long wanem ol gut-pela samting ol pipel inap kisim long kamap bilong dispela projek; na
- GAVMAN mas stretim tok bilong graun wantaim.

Ol mausman bilong grup Francis Gem na Alfred Kaket i tok sapos Gavman i no bekim gut askim bilong ol namel long tupela wik, ol pipel bai yusim pawa bilong ol long pasim dispela wok.



**PIPEL NO LAIKIM:** Ol asples Madang yet i no laikim dispela projek bilong gavman i go het. Dispela piksa ol atis i droim i soim dispela PMIZ projek bai kamap olsem wanem.

Mi ken ringim ol poroman bilong mi long 11 toea tasol wantaim Digicel.

Mi ken teksim ol poroman bilong mi long 1 toea tasol



Nau yu ken ringim eni Digicel Mobail insait long PNG long 11 toea tasol long wanpela minit namel long 11 kilok nait na 7 kilok moning Yu ken salim teks mesej i go long eni Digicel mobail long 1 toea tasol namel long 10 kilok nait na 7 kilok monin.

**Digicel**

Digicel, Etropika moa Netwek bilong PNG.

Dispela promosen i kam long ol Digicel kastoma tasol. Digicel Tems na Kondisen i stap.

**OX & PALM**  
Since 1936

Em i liklik prais tu!!

I stap klostu long stua bilong yu...

# Rait abus!

**OX & PALM**  
Since 1936  
**PORK LUNCHEON MEAT**

NET WEIGHT 150g

**OX & PALM**  
Since 1936  
**PORK LUNCHEON MEAT**

NET WEIGHT 340g

# PMIZ inap kisim 30,000 manmeri long wok

PASIFIK Merin Industriel Jon (PMIZ) inap long kisim 30,000 asples manmeri long wok.

Sampela bai wok stret long dispela bisnis senta na sampela bai kisim wok o mekim mani long liklik bisnis ol i mekim wantaim ol kampani long dispela senta.

Dispela em tok bilong Minista bilong Komes na Industri na Memba bilong Maprik Gabriel Kapris long taim ol asples manmeri I tok long pasim dispela senta.

Ol asples manmeri i tok Gav-

man i no bin toktok gut wantaim ol long kamap bilong dispela senta na olsem em i mas pasim na stretim tok wantaim ol pas-taim.

Ol pipel long Bel, Madang Lagun em ol asples manmeri i tok planti samting gavman i no stretim tok wantaim ol bipo long em i tok long kamap bilong dispela senta.

Tasol Minista i tok ol pipel i no ken tingting planti bikos planti ol gutpela samting bai kamap long ol bihainim kamap bilong senta.

Em i tok long senta i kamapim

inap olsem 30,000 wok i bikipela samting.

Em i tok moa olsem kamap bilong dispela senta tu i gutpela bikos em bai stap long planti yia i kam.

"Ol minarel bilong mipela i gat taim bilong ol long pinis tasol dispela senta bai stap long planti yia i kam."

"Olsem mipela i lukim long Misima Main we gol i pinis bihain long 20 yia."

"Kamap na stap bilong dispela senta i min mipela bai salim pis i go aut long planti kantri."

"Bai gat dairekt flait i go long Siapan na atoriti bai mekim bikipela ples balus long Madang long mekim ol bikipela balus i go kam long em," Mista Kapris I tok.

Na em tok amamas tu long Nesenel Eksekyutiv Kaunsil (NEC) long givim i tok orait long kamap bilong senta.

Dispela disisen i kamap long Septemba 30, 2009 we Gavman i tok orait long K441 milion long kamap bilong dispela bisnis senta.

Dispela mani em gavman bilong Saina i helpim na givim.



PMIZ I GUT NIUS: Kapris askim ol manmeri long luksave.

# Somare paul long toktok

MINISTA bilong Pablik Entaprais na Memba bilong Angoram Arthur Somare i mas paul long toktok.

Long em i tok kamap bilong wel na ges i stap long strong bilong em i min em i nogat moa ol gutpela tok long mekim.

Kain tok i soim hambak bilong Somare na i no laik daunim em yet, Oposisen Lida na Memba bilong Mosbi Not Wes Se Mekere Morauta i mekim dispela tok long bekim tok bilong Somare.

"Long politik laip bilong mi, mi no bin harim wanpela politisen long ples klia i apim nem bilong em."

"Dispela i bikipela sem."

"Long tok olsem LNG (Likuiifaid Nuturel Ges) projek i stap long strong bilong em i wanpela longlong toktok. Em i save long samting em i toktok long em o nogat?"

"Nogat em i ting ol manmeri long Papua Niugini i longlong ol lain olsem ol bai bilipim em tasol?"

"LNG projek i no stap long strong bilong em o long Nesenel Alaiens. Dispela projek i gat laip bilong em yet."

"Narapela Gavman inap long kamapim dispela projek na inap long kamapim long rot we Papua Niugini inap long kisim

moa mani long em," Se Mekere i tok.

Oposisen Lida i askim Somare long tokaut long olgeta tok orait papa bilong em (Se Michael Somare) i mekim long kamap bilong dispela projek.

"Kam aut, tok stret na klia long ol pipel long ol rot papa bilong em i yusim we em i no kisim helpim bilong Nesenel Eksekyutiv Kaunsil i tok orait long dispela projek.

"Wanem samting bai yu givim long ol papagraun na wanem samting bai kamap long dispela ol risoses?"

"Kain toktok Arthur i mekim i soim olsem em i wanpela ham-

bak man na i wanpela lus man."


"Em i laikim dispela projek i go het maski sampela samting i no stret long laip bilong ol manmeri."

Se Mekere i askim tu Arthur long tokaut long wanem samting em i mekim long ol sia bilong Oil Search.

Em i tok Arthur i bagarapim sia bilong Oil Search we i bilong ol pipel bilong Papua Niugini nau i laik mekim wankain long risoses bilong ol.

"Sapos nogat maski long mekim ol samting we yu no save long mekim."

"Na maski long apim nem bilong yu yet," Se Mekere i tok.



SEM YAH! Se Mekere no amamas long tok bilong Somare.

# Save long lo bilong solwara

Andrew Molen i raitim

PLANTI moa manmeri mas save gut long ol lo bilong Papua Niugini long lukaut bilong solwara.

Dispela em bilong wanem PNG em i wanpela ailan kantri solwara i gat bikipela wok insait long sindaun na laip bilong ol manmeri.

Dispela em tingting bilong "Centre for Environmental Law and Community Rights" CELCOR husat i wanpela ogenaiesen husat i save wokbung wantaim ol komyniti long lo bilong lukautim solwara na ol samting i stap insait long en.

Ol i tok gavman ino save mekim inap wok long lukautim gut ol solwara bilong PNG.

National Fisheries Authority (NFA) em han bilong PNG gavman we i save lukautim wok bilong painim pis insait long ol solwara bilong PNG

tasol i gat ol arapela wok i save kamap we i ken bagarapim mwara tu.

Wanpela bilong dispela em wok bilong painim na kisim wel na ol arapela risos aninit long solwara.

Bikipela lo bilong Yunaited nesen (UN) ol i kolim "Convention on the Law of the Sea" (UNCLOS) i karapim PNG tu.

Dispela lo i karampim ol wok bilong painim pis na tu lukautim bilong ol arapela animel, laip na ol risos i stap insait na aninit long wara.

Tasol CELCOR i tok lo bilong PNG long solwara i karamapim tasol bik solwara ol we ol wok bilong painim pis i save kamap we ol i kolim "Exclusive Economic Zone" (EEZ).

"Emi no karamapim solwara i stap klostu long ples we i stap aninit long was bilong ol papagraun," Suzie Kukuian bilong

CELCOR i tok.

Dispela hap solwara em ol i kolim "3 Nautical Miles" na em i wok bilong ol papagraun long lukautim olgeta samting i stap insait long wara long dispela hap.

Tasol ol i save painim hat tut aim bagarap bilong narapela i mekim na ol samting long solwara bilong ol i lus.

Mis Kukuian i tok lo bilong gavman ino karamapim dispela hap solwara tasol ol manmeri ken yusim lo bilong lokol level gavman (LLG) bilong ol long lukluk long wanem hevi kamap.

CELCOR i save helpim ol manmeri long skulim ol long dispela ol lo na tu wanem samting long mekim sapos ol i laikim helpim.

CELCOR i save wokbung wantaim ol arapela ogenaiesen na gavman dipatmen long lukluk long ol kain hevi bilong solwara na arapela hap bilong graun tu.

## OXFORD, TOK PISIN INGLIS DIKSENERI

Katim, na pulimapim oda fom daunbilo na salim i kam long Wantok Niuspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long Inglis, o Inglis i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

TITLE	ISBN	PRICE	QTY	SUBTOTAL
PNG Tok Pisin English Dictionary	9780195551129	K38.50		
				TOTAL K
				PAYTRESKID K
				GRAND TOTAL K

\*Suggested retail price. Corrected due to printing and is subject to change without notice.

\*Freight cost for one book: \$5.00 across PNG, \$10.00 Solomon Is, \$12.50 rest of Pacific Is, \$17.50 rest of the world.

**Options for Payment**

1) Direct deposit into Bank Account (details below)

2) Mail Cheque to World Publishing Company Ltd, PO Box 1182, BOMBO, NCD

3) Call into the office: Office 02, Sector 5A Alkhalid (1), Waigani DC, NCT

Account Name: World Publishing Company Ltd  
 Account Number: 100 000 5380  
 Bank: Bank of South Pacific Ltd  
 Branch: Commercial Centre  
 Branch Code: 8951  
 Swift Code: BOSPPGPM

FAX BACK TO : (675) 325 2579

If you are ordering more than one copy please contact us for a quote.

Phone: (675) 325 2580  
 Fax: (675) 325 2579  
 Email: world@wantok.com.pg

Name (print): \_\_\_\_\_ Phone: \_\_\_\_\_

Address (print): \_\_\_\_\_

\_\_\_\_\_ Fax: \_\_\_\_\_

Email: \_\_\_\_\_ Signature: \_\_\_\_\_

# Yumi no senisim pasin yet

Andrew Molen i raitim

GRAUN i wok long hat moa yet na i mekim solwara i wok long go antap bilong wanem yumi ol manmeri no senisim pasin bilong yumi yet.

Nogat man i harim tok na mekim ol samting we bai helpim long daunim hat bilong graun.

Dispela em wanpela luksave Dokta David Melick bilong World Wide Fund for Nature (WWF) i tokaut long en taim em i givim toktok bilong em long bung bilong ol niusmanmeri o midia long Mosbi dispela wik Tunde.

"Taim yumi katim diwai na bus, digim na tanim graun o mekim paia nating, yumi save rausim moa ges nogut we i save mekim ples i hat moa," em i tok.

"Yumi mas lainim long noken ka-

tim ol diwai na mekim paia nating," Dokta Melick i tok.

"Mi save olsem paia em i wanpela bikpela samting long Papua Niugini tasol sampela manmeri save mekim paia nating na gavman i mas lukluk long dispela sapos em i min tru long helpim na daunim hevi bilong senis bilong hat bilong graun (Climate Change)," em i tok.

PNG i gat planti ol bikpela wok bilong katim diwai na brukim graun olsem ol main.

Dispela kain ol wok i save rausim planti ol ges nogut i go insait long kilaut we i save helpim long mekim ples i hat moa yet.

Taim ples i hat moa bai em i mekim ais long ol kol ples i kamap wara na ron i go insait long solwara.

Dispela bai mekim mak bilong

solwara i go antap we i ken karamapim planti ol liklik ples long ol ailan na nambis.

Dokta Melick i tok hat bilong graun i save go antap wanpela mak olgeta yia.

Ol wok painim aut i soim olsem dispela senis bilong hat bilong graun bai mekim na planti moa hevi bilong strongpela win na ren na bikpela solwara bai kamap. "PNG em wanpela kantri we dispela kain ol hevi save kamap na sapos yumi no harim tok na mekim samting stret bai dispela ol hevi kamap moa yet," em i tok.

Dokta Melick i givim tok piksa long bikpela solwara i bruk long Samoa na Tonga, na sik long Momase sampela wik i go pinis na bikpela tait wara long Oro provins long 2007.

Em i tok dispela kain samting bai

kamap bikpela moa yet sapos PNG na ol arapela kantri tru i no harim tok long mekim ol samting long daunim dispela hat bilong graun.

"Sapos yumi no senisim ol pasin bilong yumi bai bikpela hevi bungim yumi bihain taim.

"Ples bai bagarap, ol manmeri bai dai na graun bai pinis," Dokta Melick i tok.

Dispela bung bilong ol midia dispela yia we Dokta Melick i kamap na toktok long en, i lukluk long hevi bilong senis bilong hat bilong graun (Climate Change).

Planti ol arapela bikman na saveman bilong dispela het tok tu i kamap long givim toktok bilong ol.

Dispela bung i stat long Tunde na bai pinis tete (Fonde, Oktoaba 15, 2009).

## Ol niuslain no save ripot gut long hevi bilong Klaimen Senis

James Kila i raitim

OL NIUSLAIN o midia insait long Papua Niugini i no save ripot gut long wanem as tru ol bikpela hevi olsem graun bruk, aiwara na tait wara na strongpela win i save kamap long kantri.

Planti taim ol i givim ripot tasol long ol manmeri na pikinini indai o kisim bagarap na rot i bruk na sevises i no go long ol ples.

As tru bilong dispela ol samting em klaimet senis, tasol ol niuslain o midia i save abrus na ripot tasol long samting i bagarap na soim tru wanem samting i mekim na dispela ol samting i kamap.

Dispela em bikpela salens tru Dokta Graham Sem, husat i wok olsem konsalten bilong Yunaited Nesens Developmen Program (UNDP) i bin mekim long Tunde taim em i givim toktok insait long 2009 Midia Konprens long Mosbi.

Midia Konprens em wanpela program bilong PNG Midia Kaunsil we i save kamap olgeta yia na i save lukluk long ol bikpela samting we i ken helpim long strongim wok bilong midia long promotim developmen bilong komyunikesen long kantri.

Midia Kaunsil wantaim Opis bilong Klaimet Senis na Envairomen Sastabiliti i go pas long redim ol program bilong dispela konprens na wanem ol toktok i bin kamap long hap.

Dokta Graham i bin namba wan man long givim toktok bilong em long dispela konprens long stat long Tunde we em i toktok long sampela ol sain o mak bilong Klaimet Senis em ol pipel i mas luksave long en pastaim.

Dispela saveman i tokaut olsem nau long dispela taim nau planti manmeri bai luksave olsem ples i wok long go hot tumas na tu level bilong solwara i go long kam antap. Moa long en sampela ol ples i wok long lukim bikpela ren i pundaun na sampela i wok long lukim bikpela san. Dispela em ol sain bilong klaimet senis.

Het toktok bilong dispela 2009 Midia Konprens em "Media and Climate Change" we i min olsem 'Midia na Klaimet Senis'.

Bikpela as tingting bilong dispela konprens em long lukluk i go insait gut long ol hevi bilong klaimet senis, na dispela bai ken helpim ol wan wan nius ripota o niusmanmeri long save gut long wanem samting i stap insait long saiens na ol salens bilong klaimet senis. Moa long en dispela konprens i mas luksave long wanem wok gavman, ol sekta ejensi, ol NGO (non-gavman ogenaisin) na ol komyuniti i laik mekim long daunim hevi bilong klaimet senis, na lukluk long wok bilong midia na developim sampela ol wok plen we midia i ken mekim long bringim aut ol salens long lukluk i go insait long daunim hevi bilong klaimet senis.

Planti ol saveman husat i givim ol toktok stat long Tunde i tokaut olsem klaimet senis i kamap pinis long PNG, na ol manmeri long dispela kantri i mas save.

Tasol bikpela kwesten, konprens ya i bin bringim aut olsem olsem 'Wanem samting tru klaimet Senis? Wanem samting i kamapim? Wanem hevi em i ken bringim? PNG Gavman i mekim wanem samting long dispela samting? Ol pipel i mekim wanem long en? Na midia o ol niuslain i mekim wanem long en?

**Long neks wik Wantok Niuspepa bai glasim sampela ol as bilong hevi bilong Klaimet Senis na sampela ol toktok i kamap long dispela 2009 Midia Konprens.**



PRET LONG SUNAMI: Taim tok lukaut bilong sunami i bin kamap las wik Fonde, planti manmeri long ol bikpela taun bilong yumi i bin pret na long long nabaut. Ol dispela lain em ol lain bilong Wanigela long Mosbi. Ol i karim ol kago na lusim haus bilong ol na go antap long ol ples maunten. Foto: Andrew Molen.

# San Glas kisim meri go ovasis

**K**AM pasim san long Ai. Infomol Sekta i wok strong long sampela hap long Kantri bilong yumi na planti manmeri i wok long strong long dispela liklik maket bilong ol.

Susan Vaikure em wanpela singel mama na em save salim ol ai glas long sampela hap long Mosbi, em i gat tupela susa husat i save wok long em na em save baim tupela long potnait.

Susan i tokim Wantok olsem em i salim ai glas klostu 7-pela krismas nau, na dispela mani bilong ai glas i helpim em gut tru.

"Ai glas tasol mekim na mi go long Brisben tupela taim olgeta. Mi baim tiket bilong mi long go mekim wok bilong Lotu long ai glas

mani na long Septemba dispela yia mi go daun gen long mani bilong ai glas tasol," Susan i tok.

Piksa i soim Susan Vaikure (sindaun long dram) na tupela wokmeri bilong em Kundi Barokowe na Thressa Bowoku (sindaun tamblo). Ol bilong ples Asaro long liklik ples Pikosa insait long Isten Hailans provins. Ol i sindaun salim ol ai glas long Waigani rot taim Wantok i kisim poto bilong ol.

Ol i save kain kain glas, i gat glas bilong ritim buk em ol salim K10, glas bilong ol meri long K7 na glas bilong ol man long K5. I gat ol glas bilong ol pikinini tu em ol i salim long K3.

**Poto - Nicky Bernard.**



## Planti hevi stap yet long Ramu Nikel projek...gavman i mas stretim hariap

**Michael Novingu i raitim**

ASKIM i go long nesenel gavman, Madang provinsel gavman, na Ramu Nikel projek long stretim pastaim ol hevi i stap long projek pastaim long ol i opim projek long stat wok bilong rausim nikel long graun na salim i go long Saina na ol arapela kantri.

Opim bilong ramu nikel main we bai namba wan kain main olsem long Papua Niugini bai kamap long mun Februari, 2010.

Provinsel Maining Etvausa, John Bivi i tokaut olsem ol hevi i stap long maining em gavman i mas stretim hariap pastaim long main i op long yia bihain.

Ol dispela hevi em:

- Bilong makim nupela komisin bilong graun long harim hevi bilong graun i no stret long projek;
- Wokim tupela nupela rot bilong ol asples manmeri long yusim;
- Stretim na givim ol setifiket na wok pepa bilong ol Saina wokmanmeri;
- Rausim ol manmeri i sindaun nating arere long hap bilong wok maining long Basamuk na Kurumbukari; na
- Stretim na givim tok orait long yusim bikipela piul long wok maining.

Mista Bivi i tokaut olsem i gat planti kot bilong graun i no stret yet, bihain long Komisina bilong graun, leit Patrick Nasa i dai, long sampela taim i go pinis long dispela yia.

Tupela rot Mista Bivi i toktok long en em long not na saut na rot bai bung wantaim Brahman na Danagari saut rot long bung wantaim Enekuai i go long Banu bris. Dispela ol rot, em i tok i mas i stap long muvim gut ol manmeri i go sindaun long narapela ples long taim wok bilong maining i go het.

Em i tok mani bilong wokim tupela rot bai kam long gavman na divelopa bilong Ramu Nikel projek.

Mista Bivi i tok tu olsem ol wok pepa bilong ol Saina wokmanmeri i no stret gut, na gavman opis olsem Leba Dipatmen na Mineral Risoses Atoriti, i mas wok bung wantaim long stretim ol pepa bilong ol long wok long PNG.

## Amet wari long hevi bilong ol setelmen

**Michael Novingu i raitim**

OL manmeri i stap long ol setelmen arere long Wara Wagol stat long Wagol sodas i go daun long Kerema Kompaun na Gavstoa i mas kirap lusim ol dispela hap na go bek long asples bilong ol.

Gavana bilong Madang, Se Arnold Amet i tokaut long dispela bihain long em i lukluk raun long ol setelmen na lukim olsem i gat bikipela rot bilong ol sik i ken kamap long en.

Se Arnold i tok hap ol manmeri i sindaun long en i no gutpela long ol manmeri i stap long en. Na sapos ol i stap long ol dispela hap yet, ol i ken bagarapim ples, na kamapim ol sik nogut we i ken daunim ol arapela manmeri long Madang taun.

Em i tok ol i mas stat long lusim hap ol i sindaun long en pastaim long ol eviksen komiti i go insait na rausim ol.

Se Arnold i tok ol hap we gavman i rausim ol long 2003 eviksen em, banana blok, posem 50, Gagasi blok na ol lain manmeri i go na sindaun long en gen, i mas kirap lusim hap ol i sindaun long en na na go bek long ples bilong ol.

"Gavman i laik yusim ol dispela graun long wok bisnis long en," Se Arnold i tok.

Em i askim ol lain setelmen manmeri i sindaun arere long Wara Wagol long ol i mas kirap lusim dispela ples. Sapos ol i nogat rot long go bek long asples bilong ol, gavman bilong Madang bai helpim ol long salim ol i go bek long asples bilong ol.

## PNG i stap turangu yet: Se Julius

MASKI i gat planti bilian kina i kamaut long graun long wok maining na loging, na long solwara long wok piseris long independens i kam inap nau, sindaun bilong ol lain manmeri long kantri i no orait yet.

Dispela toktok i kam long Gavana bilong Nu Ailan na bipo praim minista Se Julius Chan.

Se Julius i mekim dispela toktok long makim namba 21 Graduesen bilong OISCA skul klostu long Kerevat long Is Nu Briten.

Se Julius i tok "olgeta lain i save toktok long Papua



**Se Julius.**

Niugini i wok sindaun gut long makroekonomik developmen,

tasol tru tru em i narakain olgeta.

Ol mak bilong sindaun bilong ol man i soim olsem PNG i lukim bikipela pundaun tru long helt, edukesen na sindaun bilong ol famili. Na narapela hevi nau i stap long namba bilong ol manmeri long kantri i wok long go bikipela moa."

Em i tok makim wanpela ripot bilong Wol Benk, Esia Developmen Benk na AusAID we i tok olsem ol helt sevis long ol etpos i bruk daun olgeta na long independens i kam inap nau, 63% long ol etpos

tasol i wok long wok yet i stap.

"Helt sevis bilong ol mama i pundaun long mak bilong 80% long 1980 na nau em i stap long 58% long 2004. Hap long olgeta mama bilong yumi save kisim helt kea long taim bilong karim," Se Julius i tok.

Em i tok i klia olsem yumi mas senisim we yumi save mekim wok long kantri.

Se Julius i tok long Nu Ailan, em i luksave pinis long ol dispela hevi, na nau ol i wok kari-maut ol wok progrem bilong strongim save bilong ol manmeri bai ol i ken sanap ol yet.

# Enga laikim edministreta

## ENGA Provins i laikim wanpela edministreta nau.

Nogat sevis i kamap bikos nogat edministreta is stap bilong gimvim oda.

Laik bilong pablis sevis long wok i bruk daun na manmeri i no kisim sevis ol i laikim long em.

I nogat wanpela edministreta i stap long dispela taim bikos long hevi bilong politiks.

Dispela em tok bilong presiden bilong Nesenel Alaiens Brens long Kompam/Ambum Distrik Angale Nanes bikos sevis I go long distrik bilong em I bagarap tru.

Nanes i no amamas long pasin em Enga Gavana Peter Ipatas i mekim bihain long makim bilong nupela edministreta bilong provins Kundapen Talyaga.

Nesenel Eksekutiv Kaunsil (NEC) long las mun, Septemba i bin makim Mista Talyaga

long kisim ples bilong bipo edministreta Dokta Samson Amean tasol Ipatas i tok nogat long dispela disisen.

Ipatas i go moa long kot long rausim makim bilong NEC na larim Dokta Amean i stap yet olsem edministreta.

Nanes i tok dispela pasin bilong Gavana i mekim ol manmeri bilong Enga i wok long kisim taim nogut yet long wanem nogat gutpela sevis i go long ol.

"Las 10-pela yia i lukim ol manmeri bilong Enga i no lukim wanpela gutpela sevis."

"Kain pasin bilong Gavana i no mas lukim ol manmeri i go moa yet long kisim pen."

"Larim disisen bilong Nesenel Eksekutiv Kaunsil i kamap."

"Gavman i save long wanem samting em i mekim na Gavana Ipatas i no ken pasim," Mista Nanes i tok.

Em i tok Enga inap long kamap tasol bikos

long kain kain wok na tok politik provins i stap bek yet long wok bilong divelopmen.

Long sapotim em bipo kaunsila na nau Nesenel Alaiens Pati Presiden long Wabag Pone Lelyo i tok em i no bin lukim kain pasin i kamap long wok bilong pablis sevis bipo.

Em i tok makim bilong Gavman i laspela disisen na Ipatas i mas rispektim na sapotim dispela disisen.

"I nogat moa gutpela as tok bilong ol manmeri bilong Provins i go yet long kisim taim nogut bikos long kain kain tok politik," Lelyo i tok.



PINIS: Dokta Samson Amean, bipo Enga Provins edministreta. Foto: PAUL ZUVANI

## Singaut long ol kaunsil presiden long miting

Bustin Anzu i raitim

LONG kamapim gutpela gavman bilong ples, i mas i gat ol lidaman long ol bikpela kibung olsem ol provinsel gavman miting na ol narapela bung tu.

Na sapos ol i lusim ol lidaman olsem ol kaunsil presiden long ol kain provinsel bung, dispela ol miting bilong ol i nogat mining o nogat gutpela pait toktok long floa bilong dispela palamen.

Dispela em i tingting bilong Memba bilong Lae na namba tu lida bilong Oposisen Bart Philemon.

Philemon i tok taim ol kaunsil presiden bilong ol wan wan lokol level gavman i save kamap long ol miting bilong provinsel gavman o Tutumang bilong Morobe, ol i save wokim planti nois na paitim toktok long divelopmen stori bilong ol long ples.

Nau, taim ol i rausim dispela ol LLG presiden long ol miting, Tutumang i nogat nois na i kol olgeta. Olsem wanem na bai ol memba bilong ol wan wan ilektoret bai save long hevi bilong ol rurel eria na tu ol gavman sevis ol i laikim.

Taim ol LLG presideni stap, ol i save long hevi bilong ol long LLG bilong ol na tu, ol i save putim kamap gutpela salens na paitim toktok long kisim helpim o luksave long Tutumang.

Mista Philemon i tok taim ol LLG presiden i stap ol i save mekim planti nois insait long ples kibung na ol i save makim ol manmeri bilong ples stret. Ol narapela memba i skruim wankain nek i go na Gavana Luther Wenge i tok Morobe Provinsel Gavman i mekim wanpela ripot i go long nesenel gavman, sapotim toktok bilong Ombudsman Komisin.

Na ol dispela ol toktok i kisim blesing bilong Meya bilong Lae Siti, James Khay, husat i mekim planti toktok bilong wanem na ol i rausim ol long bung bilong Provinsel Eksekutiv Kaunsil long sampela taim i go pinis.

Em i bin tok tu olsem Lae siti i save wokim planti milien kina bilong kantri na bilong wanem na ol i no gat sampela mausman bilong ol insait long Tutumang we ol i ken mekim toktok long wok bilong Lae siti.

Ogenik Lo long Provinsel na Lokol Level Gavman i bin rausim ol LLG na ol taun meya long stap insait long ol kibung bilong ol provins, tasol dispela tingting em Ombudsman Komisin i bin kisim i go long kot.

**“READY WHEN YOU ARE” ...**

**Features:**

- CDMA 2000 1x Technology
- 200 phone book memory
- SMS (coming soon)
- Schedule
- Alarm Clock
- Data service/internet connection

**RRP K55**

**access just connect**

**TELKOM**

Enquire now at your nearest Telikom business office

# Ol rurel meri tingim wok bilong fud prodaksin

Barbara Tomi i raitim

**FONDE Oktoba 15 em i Wol Rurel Wimen's De (WRWD).**

Selebresen olgeta yia long makim dispela de i save kamap olsem praktikel we i luksave long ol meri na sapotim wok ol long rurel eria. Planti bilong ol dispela rurel meri i save wok olsem ol fama na ol liklik bisnis meri.

Ol rurel meri i makim long wan kwata bilong wol populesen o namba bilong ol manmeri insait long wol. Ol dispela lain meri i save mekim bikpela wok tru long lukautim ol famili bilong ol na developmen bilong ol rurel ekonomi. Bikos bikpela wok bilong ol i stap insait long prodaksen bilong kaikai na fud sekyuriti, ol i kamap wantaim tingting olsem Wol Rurel Wimen's De mas kamap long Oktoba 15 - wampela de pastaim long Wol Fud De.

Hap namba bilong ol meri insait long Papua Niugini em ol meri na 80-pesen bilong ol dispela meri i stap long ol rurel komyuniti. Dispela ol meri i save go pas long kamapim ol kaikai, lukautim gaden, stretim ol wan wan haus bilong famili na tu lukautim ol pikinini, stap olsem meri bilong ol man, tisa bilong ol pikinini, lukautim ol enimol, kukim kaikai na bringim mani taim ol i salim ol gaden kaikai bilong ol.

WRWD em taim bilong luksave na tingim ol wok bilong ol rurel meri long olgeta de na lukluk long sapot long sait bilong risets na developmen long helpim ol meri long rurel eria long strongim ol wok bilong ol long sait bilong fud sekyuriti na

bringim gutpela sindaun insait long famili.

Het toktok bilong 2009 Wol Rurel Wimen's De em "Rurel Wimen i stap long lewa bilong kamapim nupela tingting long wok". Bipo yet ol meri i save strong long kamapim wantaim ol gutpela tingting long mekim wok. Planti taim ol i save painim ol ansa long ol hevi ol i bungim long strongim stap bilong ol manmeri na pikinini.

PNG Wimen insait long Agrikalsa D i v e l o p m e n Faundesen wantaim ol memba husat i rejista wantaim em insait long Sauten Hailans na Isten Hailans provins bai go pas long kamapim planti ol kain kain program. Tasol sampela samting i kamap na ol dispela program ol bai putim i go long narapela taim. Program bilong Sauten Hailans ol i putim i go long neks yia bikos long Benefit Sering Miting (BSA) na long Isten Hailans em ripot bilong sik nogut ol i kolim kolera. Tasol ol lain Isten Hailans Wimen insait long Agrikalsa i kisim tok orait long kamapim ol program bilong ol long Oktoba 21.

Ol meri Sauten Hailans be putim kamaut rais projek bilong ol em ol lain Kutubu Foe Wimen's Asosiesen i go pas long en wantaim ol susa grup bilong ol olsem ol lain Namu Henamo Wimen's Asosiesen na Moran Wimen's Asosiesen.

Bikpela as tingting bilong dispela projek em long givim fud sekyuriti long ol rurel komyuniti husat planti taim kaikai bilong ol em saksak, na long taim bilong bikpela tait wara

o graun bruk i save lukim ol dispela kaikai i save go bagarap. Narapela samting tu em long givim tingting long ol meri long groim ol narapela kain kaikai long gaden bilong ol. I no saksak tasol we ol i save kisim moa taim na planti hatwok.

Ol lain meri long Sauten Hailans i soim gutpela piksa o eksampel olsem maskim ol rurel meri ol i wok strong long bungim planti ol salens na ol i win tru long abrusim ol bikpela hatwok na lukim gutpela kaikai long wok bilong ol. Gutpela kaikai bilong wok i stap long han bilong ol rurel meri long kamap wantaim gutpela tingting na strong long mekim wok i go het.

Tude, ol manmeri long graun i wok long bungim tupela bikpela salens. Dispela em namba bilong ol manmeri long wol i go long antap tru. Na dispela i min olsem i gat planti maus long givim kaikai na narapela bikpela samting em Klaimet Senis. Ol rurel meri em ol bikpela lain husat bai traim hat long bungim dispela ol salens. Dispela em bikos ol i stap long lewa bilong dispela ol ansa bilong ol hevi bikos ol i save wok klostu wantaim graun.

Presiden bilong Intanesenel Federesen bilong ol Agrikalsa Produsa, Karen Serres i tok olsem ol rurel meri em long lain tru bilong kamapim ol kaikai long ol kantri we i save bungim hevi bilong kaikai i sot na ol pipel i hangre na go bun nat-ing.

"Ol rurel meri em i 80 pesen lain husat i save kamapim kaikai long dispela ol kantri. Em i



**WOK SAKSAK:** Ol meri Kutubu i soim we bilong brukim saksak na wasim. Ol i mekim dispela long Wol Rurel Wimen's De selebresen i kamap las yia.



**WOK FLAWA:** Ol meri bilong Bubia Flonkalsa Grup bilong Lae i promotim ol wok bilong ol long Simbu Flawa So long mun Me dispela yia.

bikpela samting tru olsem ol i mas painim gutpela rot long stretim ol hevi long dispela ol kantri," Mis Serres i tok.

Em i tok olsem long sait bilong klaimet senis, ol rurel meri i ken helpim long daunim ol hevi. Ol wok insait long agrikalsa na ol gutpela wok i ken helpim long daunim ol hevi bilong klaimet senis insait long komyuniti bilong ol.

"Olgeta dispela ol wok ol rurel meri i wokim i mas gat sapot i go wantaim. Dispela ol gutpela wok ol meri i

kamapim em ol manmeri i no ken lukluk daun long en.

"Nogat gutpela developmen na ol wok long go het i mas kisim gutpela sapot olsem ol bikpela invesmen. Ol gutpela wok plen na gutpela rot long givim mani sapot i mas stap tu long promotim wok bilong ol rurel meri. Moa long en ol meri i mas bihainim nupela kain tingting na wok-about long strongim wok bilong ol. Dispela bai helpim long bringim gutpela samting

bihain," Mis Serres i tok.

Presiden bilong PNGWIADF, Maria Linibi i tok amamas long olgeta meri fama long ol rurel eria long PNG na sapotim toktok bilong Mis Serres, husat i askim olsem ol maus bilong ol meri long kisim luksave long sait bilong redim ol plen long wok long daunim hevi bilong klaimet senis i mas kisim luksave.

Moa long en ol i mas kisim luksave long gutpela ol wok ol i save

kamapim long sait bilong agrikalsa.

Mis Linibi i tok olsem PNGWIADF na ol memba bilong en i selebretim nambawan anivesari bilong ol na ol i askim Nesenel Gavman na ol stekholda insait long agrikalsa long luksave long wok bilong ol meri fama husat em ol lewa tru long kamapim ol gutpela wok, planti taim long taim bilong hevi long helpim gutpela sindaun.

# CARE Intanesenel (PNG) givim literesi na helt skul long rurel Wonenara ....bihain long hevi bilong sik kolera

James Kila i raitim

WANPELA bikpela kea ogenais-esen ol i kolim CARE Intanesinol (PNG) nau i wok long givim skul long ol rurel pipel insait long Wonenara sab-distrik long Isten Hailans provins long ol gutpela rot bilong sait bilong helt na literesi o save long rit na rait.

Dispela ol skul em long helpim ol rurel manmeri na pikinini long ples long sait bilong wasim han na kaikai na tu bihain long yusim toilet na tu long yusim gutpela klinpela wara long kukim kaikai na waswas.

Kantri Dairekta bilong CARE Intanesenel (PNG), Peter Raynes i tokim Wantok Niuspepa long Goroka olsem ol tim bilong em nau i stap long Obura-Wonenara distrik long sekim na mekim ol ripot long sait bilong sik ol i kolim kolera na disentri we i bin kilim sampela lain indai long las tupela mun i go pinis.

Mista Raynes i tok olsem ol wok bilong ol i stap long ol viles na hauslain insait long sait bilong sauten sait bilong distrik long Wonenara sab-distrik long ol ples olsem Marawaka, Andakombi na Simbari. Dispela ol ples i stap klostu long boda bilong Menyamyama long Morobe provins na tu noten eria bilong Galp em ol ples olsem Kaintiba na Kanabea.

Em i tok olsem dispela ol ples i bin lukim sik olsem influenza na disentri i bin givim hevi long ol manmeri na pikinini insait long las tupela mun i go pinis.

Mista Raynes i tokaut olsem dispela sik i bin go insait long Isten Hailans provins stat long



SKULIM: Wanpela voluntia bilong CARE Intanesenel (PNG) i givim literesi skul long rurel ples long Wonenara sab-distrik long boda bilong Isten Hailans na Morobe. Poto: CARE Intanesenel (PNG)

Menyamyama. Dispela em bikos planti ol lain pipel bilong Marawaka i save go lukim sampela lain famili long hapsait boda na tu i gat rot long Marawaka i go olsem long Menyamyama na i go olgeta long Bulolo na go long Lae. Nogat rot i save go olsem long Goroka o Kainantu stat Marawaka

i go aut.

Nau yet CARE Intanesenel (PNG) i salim wanpela tim i go insait pinis long Wonenara sab-distrik long wok wantaim ol Isten Hailans helt divisen tim long mekim ol wok sekim na tu long painimaut long ol ripot bilong sik we i stap long dispela longwe ples.

Mista Raynes i tok ol tim bilong ol i wok tu wantaim narapela NGO em Oxfam Intanesenel na EHP helt divisin tim long givim aut ol helt kea kit o samting i go long ol pipel long helpim ol long lukautim helt bilong ol insait long rurel ples ol i stap long en.

Mista Raynes i tok nau yet nogat

ripot bilong kolera i kamap bihain long dispela ripot long Daulo distrik ino long taim i go pinis. Tasol em ol helt tim long provins i go het yet long mekim wok long dispela senta ol i kamapim long Goroka Bes Jeneral Haus sik long sekim ol manmeri na pikinini long dispela sik nogut.

## Tisa em ol bun tru bilong kantri: Bossi

Michael Novingu i raitim

TISA em ol baksait bun tru bilong Papua Niugini long lainim ol pikinini bilong mipela long kirapim kantri i go het long bihain taim.

Na ol tisa em ol lain bilong wok hat insait long ol bus ples long kism sevis i go long komyuniti, tasol i nogat luksave long ol long apim potnait pe bilong ol na givim gutpela haus long ol bai ol i ken gat ol strongpela rait bilong ol yet olsem ol tisa.

Bipo etvaisa bilong edueksen long

Madang, John Bossi i mekim ol dispela toktok long makim wol tisa de long Madang Tisa Kolis.

Mista Bossi i tokim ol tisa na sumatin long Madang Tisa Koles olsem ol tisa i mas i gat lo long banisim gut ol rait bilong ol taim ol i karimaut wok bilong ol long kism save na givim dispela save long ol pikinini.

Em i tok moa olsem gavman i mas kamapim lo bilong banisim gut ol tisa long sanap long klasrum na mekim wok.

"Sapos i nogat rait bilong ol tisa long kism gutpela pe,

haus na ol arapela samting, ol tisa bai no inap mekim gut wok bilong ol," Mista Bossi i tok.

Em i tok wok bilong tisa em i hat moa, olsem na ol i mas soim gutpela piksa long sindaun bilong ol, pastaim long ol i lainim ol sumatin.

"Sapos yu no soim gutpela pasin long sumatin, komyuniti bai nogat bilip long wok bilong yu," em i tok.

Em i askim ol tisa long sanap strong na wokbung wantaim long lainim ol pikinini long gutpela bilong kantri long bihain taim.

## Wok bilong tisa em i bikpela samting

Michael Novingu i raitim

WOK bilong tisa i no bilong stat long 7 kilok moning na pinis long 4 kilok apinun o bilong go long skul bikos em i taim bilong skul.

Nogat. Tisa i wokim bikpela wok long kism developmen i kam long Papua Niugini. Ol tisa i karimaut wok bilong ol wantaim trupela na stretpela pasin long komyuniti bilong ol.

Bosman bilong Tisa

Sevises Komisn long Momase rijen, Joseph Ouyoumb i mekim dispela toktok long makim wol tisa de long Madang las wik.

Mista Ouyoumb i tok olgeta pikinini i gat rait long go long skul long lainim ol samting na kism save.

"Em i bikpela wok bilong ol tisa long lainim long kism save long gutpela bilong Papua Niugini long bihain taim," em i tok.

Em i tok wok bilong

lainim ol pikinini i no wok bilong ol tisa tasol. Nogat. Em i wok bilong ol papamama, tisa, ol pikinini, gavman, komyuniti long lainim ol pikinini long gutpela samting long kirapim tingting bilong ol long kamapim gutpela sindaun bilong ol long komyuniti bilong ol.

"Mi save olsem nogat gavman sevis i go long ol busples long kantri bilong yumi tasol wanpela gavman woklain yu bai painim em tisa. Yu

mas sanap strong long karimaut wok bilong givim save long ol pikinini," Mista Ouyoumb i tok.

Em i tok ol lida manmeri bilong bihain taim bai sindaun insait long skul haus wantaim ol tisa long olgeta hap bilong Papua Niugini. Em i tok ol i stap long han bilong ol tisa long lainim ol long kamap strong long developim kantri wantaim gutpela sindaun long ol hauslain bilong ol.

# UNICEF na WHO putimaut wokplen long daunim na stopim sik pekpek wara

**BIKPELA ol wok long pait agensim sik pekpek wara o dairia, we em namba tu bikpela sik i save kilim ol liklik pikinini long wol i mas kamap strong gen.**

Dispela bai helpim long stopim dai bilong planti milien pikinini long wol.

UNICEF na Wol Helt Ogenaisin (WHO) i bin tokaut long dispela long aste (Trinde, Oktoba 13) taim ol i putim kamaut ol nupela ripot long dispela sik nogut em pekpek wara.

"Em bikpela birua tru olsem sik pekpek wara i save kilim samting olsem 1.5 milien ol pikinini long wan wan yia," Eksekutiv Dairekta bilong UNICEF, Ann M Veneman i tok.

"I gat ol rot we i no dia tumas na

i gutpela long daunim sik pekpek wara i stap, tasol long ol liklik kantri long wol 39 pesen bilong ol pikinini wantaim sik pekpek wara i save kisim dispela ol marasin.

Dispela ripot ol i kolim "Sik Pekpek Wara: Bilong Wanem ol Pikinini i Dai yet na Wanem Samting long Mekim" i tokaut long seven poin plen we i kam wantaim ol marasin long daunim sik pekpek wara na indai na tu ol rot long daunim dispela sik nogut. Ol dispela 7-pela samting em:

1. Redim wara long stopim man i sot long wara long bodi
2. Zink marasin
3. Kisim marasin bilong rotavirus na misels
4. Promotim rot long givim susu bilong mama long pikinini

wantaim vitamin A saplimens

5. Promotim moa pasin bilong wasim han wantaim sop
6. Bringim kamap gut hamas wara na kwaliti bilong na rot bilong stretim gut na putim long gutpela ples insait long haus; na
7. Promotim moa rot bilong stretim ol rabis insait long komyuniti.

Dairekta Jeneral bilong WHO, Dokta Margaret Chan i tok olsem ol i save wanem ol ples insait long wol we planti ol pikinini i wok long indai long dispela sik pekpek wara.

"Mipela i save long wanem rot long stopim dispela sik pekpek wara. Mipela mas wok wantaim ol

gavman na patna long putim dispela ol seven poin plen i karim kaikai bilong," Dokta Chan i tok.

Planti ol wok long daunim sik pekpek wara insait long 1970s na 1980s i bin kamapim gutpela wok long bringim aut ol wok bilong oral dihidresin solusen (ORS) long givim gutpela wara long bodi bilong ol pikinini na givim skul long ol lain i yusim dispela rot. Maski olsem dispela rot i soim gutpela wok, long ol yia i no long taim i go pinis ol intanesenel komyuniti i muvim lukluk bilong en i go long ol narapela sik long wol. Olsem na nau em bikpela wok i stap long strongim gen wok bilong daunim sik pekpek wara long wol.

Gutpela na klinpela wara na gutpela helti pasin em ol nambawan gutpela rot long stopim sik pekpek

wara namel long ol pikinini. Wasim han wantaim sop em wanpela bikpela rot tru long daunim sik pekpek wara inap long 40-pesen. Dispela em wanpela bikpela samting long helpim long daunim namba bilong ol pikinini i dai long wol.

Moa long 88-pesen long sik pekpek wara long wol i save kamap bikos long doti na i no gutpela wara bilong dring na tu doti na planti pipia i stap nabaut long ol ples.

Stat long yia 2006, mak olsem 2.5 bilien pipel long wol i no yusim ol gutpela ples long tromoi pipia na samting olsem wanpela namel long foapela pipel long ol liklik kantri i i no save yusim toilet na i save tromoi pekpek bilong ausait.

## Helt Dipatmen kamapim 10-yia plen

Paul Zuvani i raitim

INAP long 100 helt menesa na plena bilong Hailans rijen i bung long Goroka, Isten Hailans Provins long aste Trinde na toktok long 10 yia plen bilong Dipatmen.

Dispela i namba tu kibung bilong foapela ol kibung we dipatmen i holim long foapela rijen long toktok long dispela plen.

As tingting bilong dispela ol kibung em long lukim ol pipel i kisim gutpela sevis, Helt Dipatmen i gat gutpela sistem long mekim wok na ol manmeri i gat gutpela save bilong stap helti.

I olsem inap long 2020 ol manmeri long Papua Niugini i gat gutpela sindaun we ol liklik sik i no kisim ol manmeri na ol manmeri i no dai bikos ol i sot long kisim helt sevis o marasin i sot.

Ol mama na pikinini i gat gutpela helt na ol pikinini i strong long go skul.

Kibung bilong Goroka bai pinis long tude.

Mark Mauludu, Deputi Seketari bilong Helt long Nesenel Helt Polisi na Koporet Sevis long taim bilong opim kibung i tok dispela helt plen i bikpela samting.

Long pinis bilong dispela ol kibung na bihainim kamap bilong plen ol manmeri long Papua Niugini i mas pilim olsem dispela i plen bilong ol.

Ol i tok na plen i kamap bikos ol i putim tingting bilong ol i go insait long rot bilong kamapim gutpela helt.

Namba wan kibung bilong wan wan ol rijen em Dipatmen i holim long Alotau long Milen Be Provins.

Mista Mauludu i tok ol lain husat i mas go pas long kamapim dispela plen em ol provins na distrik.

Em i tok Dipatmen i kamapim dispela plen bihainim tok orait i kamap long narapela bikpela kibung we Dipatmen i holim pas-taim long dispela yia long 2009.

"Mipela i laikim olgeta manmeri long kam aut na serim ekspiriens na tingting bilong ol long wanem samting i mas kamap," Mauludu i tok.

Misis Elizabeth Gumbageti, eksekutiv Menesa bilong Stratejik Polisi i tok tu olsem eksekutiv menesmen tim bilong Helt Dipatmen i wok long kamapim lidasip long developim nupela nesenel helt plen.

Mis Gumbageti i tok nupela helt plen i bikpela samting we i kamap na olsem olgeta provins na distrik i mas gat tok long kamap bilong em.

"Em i wok bilong mipela long mipela i mas soim rot long ol manmeri long wanem samting mipela i mas mekim long stap helti."

"Sapos mipela i no soim ol manmeri long wanem samting mipela i mekim ol pipel tu bai paul."

## Tude em i Wol Wasim Han De

TUDE, Fonde, Oktoba 15, 2009 em i Wol Wasim Han De (Global Handwashing Day).

Long dispela de, em i taim bilong makim strong bilong pasin bilong wasim han wantaim sop na wara.

Dispela kain pasin, em i namba wan we bilong stopim planti kain sik nogut olsem dispela sik kolera i kamap insait long Morobe provins.

Moa long 2,500 skul sumatin insait long Nesenel Kapitel distrik, Lae na Hagen bai kisim ol tok awenes i kam long UNICEF na Colgate-Palmolive (PNG).

Olgeta yia, sik pekpek wara na sik bilong brosi i save kilim moa long 3.5 milian pikinini krismas bilong ol i aninit long 5. Wara tasol i no inap. I mobeta long wasim han wantaim sop long ol taim we yu pinis long yusim toilet, na pastaim long yu kaikai.

Sapos yu mekim olsem, bai em i ken pasim yu long kisim ol kain kain sik pekpek wara.

Tasol bikpela hevi nau long wol em i no planti manmeri na pikinini i save wasim han bilong ol wantaim sop.

Maski sop em i samting we i stap insait long planti haus long wol, pasin bilong wasim han



WASIM HAN: Wasim han wantaim sop em i namba wan rot long pasim planti ol sik nogut i ken go insait long bodi bilong yumi.

wantaim sop i nogat mekim.

Aninit long het tok "Clean hands save lives" o klinpela han i ken sevim laip, namba tu Wol Wasim Han De kempen bai skulim gut ol skul pikinini.

Wara, na gutpela klin pasin skul nau i go insait long olgeta skul we ol i tokim ol sumatin olsem ol i mas wasim han bilong ol wantaim sop oltaim. Ol dispela skul i

wantaim sop i nogat mekim.

Aninit long het tok "Clean hands save lives" o klinpela han i ken sevim laip, namba tu Wol Wasim Han De kempen bai skulim gut ol skul pikinini.

Wara, na gutpela klin pasin skul nau i go insait long olgeta skul we ol i tokim ol sumatin olsem ol i mas wasim han bilong ol wantaim sop oltaim. Ol dispela skul i

soim klia olsem ol i ken lukim na mekim, na bihain, ol i ken karim i go bek long ol haus lain bilong ol.

Las yia, samting olsem 200 milian pikinini i bin wasim han bilong ol long Wol Wasim Han De. Dispela em ol pikinini insait long 86 kantri.

Dispela yia, moa pikinini, ol tisa, ol papamama, ol gavman lida long moa long 80 kantri bai mekim wankain.





## Yu sot long wanpela samting!

SISTER Grace Maia SSpS, em i wanpela Holi Spirit Sista (SSpS) bilong Is Timor, nau em i mekim wok misineri long kantri Brasil. Nau em i stadi long wanpela Yunivesiti.

Las wik em i bin serim wanpela naispela eksperiens bilong em long wanpela e-group bilong SVD na SSpS misineri bilong Flores na Timor (Indonesia), na Is Timor, i wok long olgeta hap bilong graun. Dispela e-group mipela i kolim Berandamisi (Weranda bilong ol Misineri).

Taim em i lukim bikipela hevi i kamap long Sumatra, Indonesia, em i tingim na mekim sampela wok helpim i go long ol viktim bilong guria. Em i salim aidia bilong em i go long sampela pren bilong em long katim lans mani bilong ol na bungim na salim i go long Sumatra.

Em i tokim narapela pren olsem; "inap sampela de yumi noken baim kai kai bilong lans long kantin bilong skul, na sevim dispela mani i go long ol manmeri bilong Sumatra"

Planti student i sapotim aidia bilong em na sampela i wokim narapela komitmen bilong ol long sevim bas fe bilong ol na ol i wokabout go na kam i go long kampus bilong ol. Inap las wiken ol i bin bungim tausani mani bilong Brasil, na sapos i senisim i go long Rupiah em i bai kamap million pinis. Dispela wok nau ol i kisim planti sapot bilong profesa bilong ol tu.

Stori bilong Sister Grace i mekim mi tingim gen wankain wok mipela i bin wokim long Erima Peris long taim bikipela Sunami i kamap long Not Sumatra sampela yia i go pinis.

Mi bin amamas tru bikos ol manmeri bilong Erima yet i bin kirapim dispela tingting na long wanpela mun mipela i bin bungim moa long Faiv Million rupiah na mipela i salim i go long Sumatra.

Dispela faiv milion, em i bikipela tumas sapos wanpela man o meri bilong Erima peris yet i wokim.

Tasol planti manmeri i givim han na sapot, sampela i givim bikipela mani sampela i givim liklik, na olgeta i bung na kamapim dispela faiv milion rupiah long en. Em inap long helpim wokim tupela o tripela haus pinis long Sumatra Indonesia.

Mi wokim dispela stori bilong helpim yumi tingim gen toktok bilong Jisas long Mak: 10: 17 - 30, i go long wanpela man i gat planti samting i kam long em, long painim we i go long Kingdom bilong Heven.

Em save gut long ol lo bilong God, tasol Jisas i tok "Yu sot long wanpela samting". Bikos man i gat save long lo bilong God tasol em i no soim long laip bilong em olsem em yet i save long Lo bilong God.

Stori bilong Sister Grace na manmeri bilong Erima i soim olsem, ol i save long Lo bilong God na mekim dispela lo bilong God i kamap LAIP, long laip bilong ol. Save tasol i no inap.

Yumi ken save long tenpela mandato bilong God, tasol yumi nogat komitmen bilong yumi long mekim Lo bilong em i kamap laip, yumi bai stap olsem emti dram i save pairap bikipela tru. Mobeta yumi yusim gut save bilong yumi long mekim wok bilong helpim manmeri i gat nid.

Noken lukluk long ol manmeri i stap long we long yumi tasol. Manmeri i stap klostu long yumi olsem memba bilong famili o komyuniti bilong yumi.

Ol i nidim save bilong yumi long helpim ol tu. Ol i nidim laik pasin bilong yumi i no long maus tasol!

# Bisop Herman Raich I dai pinis

LONG FRAIDE, Oktoba 9, 2009 long 4 kilok moning, Bisop Herman Raich, SVD, Katolik Bisop bilong Wabag Daiosis long Enga provins i bin dai.

Sampela mun i go pinis, em i bin sik. Em i bin lusim wok long mekim wok bilong Bisop las yia tasol.

Mama i bin karim em long namba 2 de bilong mun Me, 1934, long ples ol i kolim Jerzens, Tirol insait long kantri Austria. Em i bin kamap long wanpela gutpela na strongpela Katolik famili. Em i gat tupela brata i bin kamap misinari Brata insait long lain bilong Divain Wod Misinari (SVD) na tupela susa bilong em i kamap misinari Sister insait long Katolik sios.

Taim em i pinisim hai skul bilong em, em i bin joinim Divain Wod Misinari (SVD) long Santu Gabriel long Vienna. Em i bin kamap long yia 1946. Stadi bilong em i go gut, olsem na long Epril 29, 1962, em i bin kisim Ordo long kamap Pater insait long lain bilong SVD.

Tupela yia bihain, long 19 Mas 1964, em i bin kamap long Papua Niugini. Supiria bilong em i salim em i go mekim wok misinari long Enga provins. Bisop i bin makim em long statim wanpela nupela paris long Mang – Kandep insait long Enga provins. Em i bin kamap peris pris bilong Mang inap long 16 yia olgeta.

Long yia 1980, ol i bin transferim em i go long Sangurap, long Wabag taun. Tupela yia bihain, long yia 1982, Pop i bin makim em i kamap Bisop na statim nupela Katolik Daiosis bilong Wabag. Long Epril 29, 1982, em i kisim ordo long kamap bisop na em yet i kamap namba wan Bisop bilong Wabag Daiosis.


Inap long 25 yia olgeta em i bin mekim wok bisop, wanpela gutpela wasman tru bilong lukautim manmeri bilong Wabag Daiosis. Bikos em i bin kisim sik, olsem na las yia tasol em i bin ritaia o lusim wok na long Oktoba 2008, Bisop Arnold Orowae, wanpela as ples pater stret bilong Sikiro paris i bin kisim ples bilong em long kamap bisop bilong Wabag Daiosis.

Taim ol i askim em long go ritaia long Austria, Bisop Herman i tok nogat. Em i laik ritaia yet long PNG inap long las win bilong em. Em i laik kamap wan wantaim graun bilong Enga, PNG.

Olsem na long Trinde, Oktoba 14, 2009, ol i bin wokim lotu funeral bilong em na planim em long matmat bilong ol misinari long Par.

Bisop Herman em i wanpela man i strong tru long soim daun pasin na wanpela isi man stret. Planti manmeri i save long em i kolim em olsem, "wanpela holi man na man bilong God stret".

Bai em i stap isi long laip bilong oltaim.



Leit Bisop Herman Raich

## Nupela mama lo bilong ELC-PNG Papua distrik

Egareka Greg Noine i raitim

ELC-PNG Papua Distrik i gat nupela mama lo bilong ol sios memba i mas bihainim long sapotim na groim wok bilong Luteran sios i go het na kirapim wok gut nius long distrik.

Dispela mama lo o konstitusen em distrik i kamapim wantaim helpim bilong ol loya, long bringim gutpela wok bung namel long wan wan Luteran kongrigesen.

Distrik Jeneral Sekreteri bilong ELC-PNG Papua Distrik, Singe Nopa i tok olgeta wok redi bilong konstitusen bilong distrik i redi pinis tasol em i wetim tok orait bai kam long Papua Distrik Konprens flua long mun Oktoba.

Konprens bai kamap long Santu Samuel Luteran Sios kongrigesen long Popondeta, Oro Provins long Oktoba 1 i go inap 4, 2009. Mista Nopa i tok klia long Popondetta taim em i kam visit long lukim wok redi bilong konprens olsem Papua Distrik nau i laik wok klostu wantaim olgeta kongrigesen bilong en long distrik olsem na dispela konstitusen bai kamap was papa o lo bilong helpim distrik na wan wan kongrigesen long kamapim gutpela wok bung. Emi tok pastaim administresen i no bihainim stret wanem rot na we o lo ol i bin sanapim long kamapim gutpela wok bung olsem na wokbung i no bin kamap gut.

Mista Nopa i tok nau em i go aut long wan wan kongrigesen long kisim tingting na luksave long wanem kain kain hevi i save daunim wok sios insait long distrik.

## Pasin helpim i mas stap strong

Egareka Greg Noine i raitim

PASIN bilong helpim arapela i mas stap strong tru namel long olgeta Luteran kongrigesen insait long Papua distrik.

Dispela em i toktok bilong Jeneral Sekreteri bilong Papua distrik, Singe Nopa.

Em i tok olsem taim em i bungim ol Luteran sios lida wantaim ol pasto long klarim nupela konstitusen bilong ELC-PNG Papua Distrik.

Em i tokaut tu olsem distrik i no bihainim sampela promis em i mekim bilong karim hevi wantaim ol kongrigesen insait long distrik.

Mista Nopa i tok nau distrik i gat plen bilong lukluk na sapotim ol pasto i stap long rurel eria we kongrigesen i nogat inap mani bilong stretim potnait belgut bilong ol pasto.

Distrik i stat pinis long apdetim ol pasto profail bilong olgeta pasto long distrik long helpim ol pasto

long baim skul fi bilong ol pikinini bilong ol inap krismas bilong ol i abrusim 18 yia na bai ol i lusim.

Mista Nopa i bekim askim bilong ol pasto insait long Popondeta.

Em i tok distrik i redi long kirapim wok bung namel long kongrigesen level i go long distrik level olsem na em i tok taim distrik i nidim sapot long wan wan kongrigesen long yia, kontribusen long helpim distrik long baset bai dispela ol plen bai wok.

"Sapos yu no helpim, orait, ol plen i no moa wok na hevi bai kam bek gen long yu," em i tok.

"Pasin bilong helpim arapela na karim hevi wantaim i moa gutpela bikos yumi olsem ol Kristen em wok bilong yumi. Jisas Kraus i amamas long karim hevi bilong yumi, olsem na yumi gat wok bilong serim na karim hevi wantaim long groim na bildim sios bilong God i go bikipela," Mista Nopa i tok.

**WANTOK**  
KOMENTRI

**Yumi no redi**

LUSIM olgeta toktok bilong ol bikipela risos projek we bai pulim planti bilian kina i kam insait long kantri bilong yumi.

Yumi no redi gut yet long banisim yumi yet long ol hevi bilong mama graun.

Tru tumas, sapos yu bin lukim pasin bilong ol manmeri taim bikipela tok lukaut long sunami i bin kamap las wik, bai yu luksave olsem yumi PNG i nogat inap banis long ol kain hevi na birua bilong mama graun.

Long dispela mun Oktoba planti ol bikipela kantri long wol i wok bungim hevi bilong wara i tait, ol bus na diwai i paia, ren i pundaun long mak i abrusim mak bilong olgeta taim bipo, na guria i seksekim ol.

Insait long Pasifik yet, ol wansolwara bilong yumi i wok planim ol dai manmeri bihainim ol guria na sunami.

Na yumi bai olsem wanem?

Sapos gavman i wok long aipas long ol hevi mama graun i ken givim yumi, em i mas opim ai bilong em nau na lukluk long wanem ol hevi ol arapela kantri long rijen na wol tu i wok long bungim.

Gavman i wok long toktok planti tru long hevi bilong ol manmeri bilong Katerets ailan long Bogenvil, na ol i wok long go aut long wol na tokim ol arapela kantri olsem mipela i bungim dispela hevi pinis.

Tasol i nogat wanpela toktok i kamap long rot bilong stretim hevi bilong ol manmeri husat i stap long ol arapela ailan provins bilong yumi na we ol bai go sapos birua i painim ol.

Dispela wik midia long kantri i wok long sindaun na toktok long dispela samting, klaimet senis.

Ol mansave bilong dispela samting i kam na givim tingting bilong ol tu long en.

Tasol gavman i mekim wanem stap?

Bai yumi wok toktok tasol long kabon treding bikos yumi wok tingting long kisim mani long paus bilong kantri tasol?

Klaimet senis em i wanpela bikipela birua. I no birua bilong wanpela ailan o wanpela lain manmeri, o wanpela lain kantri tasol.

Nogat. Em i birua we i ken bagarapim yumi tude, na ol tumbuna bilong yumi long bihain taim.

Wok senis i mas kamap nau long tingting bilong olgeta han bilong gavman na wok bisnis bilong en.

Yumi ken go na tokim ol arapela kantri olsem yumi PNG i luksave na pilim pinis hevi bilong en, tasol sapos tingting bilong yumi i stap bihainim rot bilong ol taim bipo, bai yumi lus yet.



**Putim bek ol Kaunsel Presiden long Asembli**

WANPELA provinsel asembli memba bin tokaut bipo olsem, mipela ol provinsel lida i makim tru pes bilong ol pipel bilong ples. Olsem na taim yu lukim mipela i sanap long floa bilong Provinsel Asembli em yu ken luksave stret olsem lida bilong dispela distrik o wod kaunsel eria.

Sapos kaunsel presiden bilong Hube Lokol Level Gavman i sanap em mipela ken luksave klia tru long pes na tok pisin bilong em olsem em lida bilong Hube long Finsafen, Morobe provins. Sapos kaunsel presiden bilong Koiari Lokol Level Gavman i sanap toktok long Sentrel Provinsel Asembli em mipela ken tok stret olsem em lida bilong ol pipel bilong Koiari long Sentrel provins. Wankain tu long ol wanwan liklik wod kaunsel eria insait long olgeta provins.

Tasol nau sapos yu raun long olgeta provinsel asembli bung bai yu lukim olsem olgeta sit i stap nating bikos olgeta dispela kaunsel presiden i no stap moa.

Sampela yia i go pinis em nesanel gavman i bin senisim Lo



bilong Provinsel na Lokol Level Gavman we i rausim olgeta kaunsel presiden long ol Provinsel Asembli. Provinsel Asembli em bilong ol nesanel lida bilong Palamen tasol long kam sindaun na toktok long hevi bilong provins.

Long Manus provins em tupela man tasol save sindaun long Haus Lapan na toktok long hevi bilong ol pipel taim ol Kaunsel Presiden i sanap hangamap long sait sait na harim tasol stap. Long Bogenvil em 5-pela man tasol, Nu Ailan em tripela tasol na long Oro provins em tripela tasol.

Tasol astingting em olsem, maus tru bilong ol pipel long wod kaunsel eria na distrik em nogat bikos ol lida we i save slip na kirap wantaim pipel long olgeta de em ol nogat sans long toktok long Provinsel Asembli long hevi bilong ol pipel bilong ol.

Tru olsem insait long distrik em ol presiden wantaim ol wod kaunsel na nesanel memba save sindaun na toktok long ol wok na projek. Tasol mi ting ol toktok ya save sut tasol long projek we ol mas putim insait long distrik plen bilong memba ken kisim mani bilong i kam long Waigani long Opis bilong Rurel Dvelopmen (ORD).

Tasol olsem wanem long karim hevi bilong ol pipel i go insait long baset bilong provins? Provins mas skelim baset bilong em tu go long stretim ol hevi na wari bilong ol pipel insait long ol distrik. Olsem na sapos ol tupela o tripela nesanel lida tasol toktok long Asembli, ol bai toktok long antap tasol. Na astingting tru na wari tru em ol lain i save gut i no stap long kamapim na skelim go insait long provinsel baset.

Ol provinsel taun em olsem hetkwata bilong wanwan provins we gavman bilong provins i stap. Na olgeta liklik distrik save kam bung long dispela hetkwata bilong ol long lukim ol gavman opis long helpim ol wantaim ol hevi o kisim sevis. Ol bikipela pablik sevis

save go long ol provinsel hetkwata olsem na dispela hetkwata mas join wantaim ol distrik long sevis bai ron go daun.

Tasol ol man bilong sanap na toktok na tokaut long ol wok na hevi we i stap long distrik we pablik sevis mas mekim wok go daun em ol i no stap.

Dispela em olsem wanpela bikipela bris long provinsel hetkwata go daun long ol distrik i bruk olsem na sevis bai kam pas long hapsait tasol na stap long ol taun o ol provinsel hetkwata tasol.

Nesanel gavman mas skelim gen dispela Lo bilong ol na putim bek ol Kaunsel Presiden bilong ol wod kaunsel eria o Lokol Level Gavman go bek long wanwan Provinsel Asembli bilong ol gen. Ol dispela provinsel lida em ol tru tru maus na nus pes bilong ol pipel.

Ol nesanel lida noken pret long nogut ol Kaunsel Presiden bai kisim moa save long politiks na kisim strong long salensim ol long nesanel ileksen. Em gridi na pret pasin. Nesanel ileksen em bilong olgeta manmeri long sanap na resis long winim. Laik em bilong pipel long makim husat nesanel lida bilong ol.

**WANTOK**  
Published Weekly, Thursday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: (675) 325 2500  
Fax: (675) 325 2579  
Email: editorial@wantok.com.pg

Pe bilong wanpela yia  
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Koroga

Editor  
Neville Chou

Published at  
Section 5B, Allotment 3  
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

## Narapla guria i kamap gen klostu long Tonga na Samoa

WANPELA guria, em i no strong tumas, i bin kamap gen klostu long Tonga na Samoa.

Dispela i bin wanpela long planti ol guria olsem em ol i bin wok long sekim sekim dispela eria bilong Saut Pasifik.

Nogat tok lukaut long sunami i kamap bihain long dispela guria, em strong bilong en i bin 5.9, i bin kamap tenpela kilomita daun long graun, samting olsem 340 kilomita long not is bilong Tonga na 260 kilomita saut wes long Apia long Samoa.

## Gavman welkam long askim bilong Australia

INDONESIA i tok welkam long askim bilong Australia Praim Minista Kevin Rudd long sapos ol i ken helpim Australia long lukluk long wanpela bot i pulap long 260 pipel bilong Sri Lanka husat i laik kam long Australia, em ol i painim ol insait long Indonesia solwara.

Indonesia niusman, Geoff Thompson i ripot olsem, Indonesia Foren Ministri Mausman, Teuku Faizasyah i tok kantri bilong em i lukim askim i kam long Mista Rudd, olsem wanpela gutpela samting em i soim gutpela wokbung namel long tupela lida na tupela kantri, long stretim ol hevi i kamap long rijen.

Mista Faizasyah i tok, helpim bilong Australia i bin helpim ol Indonesia atoriti long painim dispela bot em i karim 260 Sri Lanka asailum sika.

Taim ol i askim em sapos Indonesia i ting Australia i wok long givim wok gen long Indonesia bilong stretim imigresin wok bilong en, Mista Faizasyah i tok dispela hevi em i rijenal hevi na em i laikim olgeta long rijen long stretim.

## Memorial bilong tingim Vivian husat i dai long tsunami

MAN bilong wanpela meri bilong Viktoria long Australia, husat i bin dai long Saoma sunami, i tok em i tingim misis bilong em olsem wanpela gutpela mama husat i save laikim tru laip.

Candice Wyatt i ripot olsem, Vivien Hodgins i bin wok long holide gut long Samoa taim sunami i kamap na bagarapim ples tupela wik i go pinis.

Ol pren bilong em, famili, ol wanwok bilong em, na ol sumatin bi-



## Sip i karim ol Asailum Sika manmeri

HAIT NA KAM:

Wanpela niusman bilong Indonesia i sanap kisim poto long wanpela kago sip bilong Sri Lanka i kam long Cilegon haba long Indonesia long Mande dispela wik. Indonesia Nevi i bin holim pasim dispela sip. Ol i bin holim tu 260 Sri Lanka imigren o refuji i bin hait i stap antap long dispela sip. Ol i wok traim hait na go insait long Australia.

long bipo na bilong nau long Balarat Maun Clear College, we em i bin wanpela tisa, i bin bung wantaim bilong tingim Vivien Hodgins olsem wanpela gutpela mama husat i gat tupela pikinini.

Brata bilong em, Robert Hodgins, i bin tokim ol pipel i bung, olsem dai bilong susa bilong em i wanpela hatpela samting tru long em long bungim, na em i no bilip em dai pinis.

Long Sarere dispela wik, Mis Hodgins bai selebretim 56 betde bilong em, tasol em bai nogat nau.

## Ol papagraun long Panguna amamas long visit

OL PAPAGRAUN long Panguna main long Otonomes Bogenvil Rijen, Papua Niugini, i bin tok welkam long wanpela main opisal husat i go raun lukim ol.

Raut bilong dispela opisal i kamap sampela yia bihain long ol i bin pasim main.

Ol i bin pasim main 20 yia i go pinis, bihainim ol kros long graun na abgarap long envaironmen.

Firmin Nanol i ripot olsem, Bogenvil Presiden James Tanis i bin askim Bogenvil Kopa Limitet Sekreteri, Paul Coleman long go toktok wantaim ol long stat bilong dispela mun.

Em i tok askim bilong ol long Mista Coleman i go, i no soim olsem ol i redi long opim gen main, o long statim gen wok long main.

Em i tok em bilong larim tasol kampani i go na harim tingting bi-

long Bogenvil long maining, bihainim ol trabel na pait we planti tausen i bin dai na ol samting i bagarap.

Mausman bilong Interim Panguna Lenonas, Lawrence Daveona i tok dispela raun i bin gutpela bilong helpim wok bilong rekonsiliesen o belisi.

PNG gavman i no yet givim olgeta pawa bilong lukautim main i go bek long Otonomes Bogenvil Gavman.

Bogenvil i no inap larim maining wok i kirap gen taim em i no holim dispela pawa.

## Ol kokoda papagraun laikim kompensasin

OL PAPAGRAUN klostu long Kokoda i laikim kompensasin bilong ol bagarap i bin kamap long busgraun bilong ol bihain long taim wanpela balus i bin bagarap na pundaun long hap long mun Ogas.

13 pipel i bin dai long dispela bagarap, nainpela long ol i bin ol Australia.

Papua niugini niusman Liam Fox, i ripot olsem, Seli, Jack na Timothy Dadi, i papa bilong graun arere long maunten klostu long Kokoda we dispela Airlines PNG balus i bin pundaun.

Seli Dadi i tok ples bilong ol long stap laip i bin bagarap na ol wara ol i save kisim wara long en i bin bagarap long piul bilong balus na blut.

Dadi na famili bilong em i raitim pas pinis i go long Airlines PNG na askim long samting olsem 250

tausen dola kompensasin.

Ol i tok ol i no gridi na ol i tok wanem mani ol i kisim bai ol i serim namel long ol asples manmeri.

Samoa gavman laik muvim pipel longwe long solwara

GAVMAN bilong Samoa bai miting bilong toktok long hau bai ol i ken kirapim tingting bilong viles pipel long muv lusim ol nambis na go moa insait long bus.

Ol i laik mekim dispela bihain long sunami i bin bagarapim kantri na kilim i dai samting olsem 140 pipel.

Gavman bai kamapim plen bilong sindaunim pipel long ol eria i stap antap liklik, longwe long solwara.

Sif Eksekyutiv bilong Samoa Praim Minista Opis, Valsa Epa, i tok gavman i tingting tu long wokim wanpela eria olsem memorial bilong tingim ol pipel i bin dai long sunami.

Em i tok wanpela tim bai miting tumora bilong toktok long mani bilong dispela progrem bilong muvim pipel i go antap longwe long nambis.

## Bainimarama tok ol eid ejensi bai givim mani bilong len rifom

INTERIM Praim Minista bilong Fiji, Frank Bainimarama, i tok i luk olsem ol intanesenel eid ejensi bai givim mani bilong len rifom bilong Kantri.

Komado Bainimarama i tok Wol Benk na Intanesenel Moneteri Fan

bai go long Fiji long stat bilong mun bilong toktok long dispela samting.

Em i tok, ol i plenim ajenda bilong dispela len rifom bilong traim na sevim Fiji suga bisnis em i no ron gut dispela taim, na tu, bilong opim moa rot bilong turisim.

## Ol ekonomi long rijen bai i no go antap

WANPELA nupela Pacific Economic Survey i painim olsem groa bilong ol ekonomi long rijen bai noken go antap olgeta dispela yia, na i tok, sampela bai tokaut long ol baset defisit - o baset bilong ol bai sot.

Em i singautim ol rijenal gavman long mekim moa bilong strongim ekonomi bilong ol bai ol i ken sanap strong taim ol hevi i kam long ol narapela kantri.

Em i painim olsem, bagarap i kam long dispela hevi ol i kolim global kraisin i min planti long ol kantri long rijen bai no inap kamapim olgeta samting ol i laikim bilong mitim long Milenium Dvelopmen Gols.

Tasol em i tok, i gat gutpela sampela samting i kamap long rijen long wanem ol i bin opim rot na kamapim senis long sait bilong ol telekom sevis na ol balus bisnis.

Tasol siaman bilong rijenal komiti em i wokim dispela ripot, Sif Ekonomis bilong AusAID, Mark McGillivray i tok ol i laik lukim moa gutpela samting i kamap long sait bilong painim ol narapela we bilong kisim pawa o eneji, long gavanens, edukesen, na long tred.

**Pacific BEAT**

4. 5. 6am & 4pm. 5pm  
including sport

Listen to Radio Australia  
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



**Bris i lait** : OL kala kala lait i sain antap long Kurilpa Bris i stap long Brisben, Australia, na em i kamap stail olgeta. Dispela bris i silip namel long bisnis ples long Brisben siti na Kurilpa Poin long Saut Brisben. Ol i bin opim namba wan taim long Oktoba 4, 2009.




**Pulim lain**: TAIM mama i wokabaut i go pas, ol pikinini i mas bihainim gut. Ol d pato i wok swim bihainim mama bilong ol long wanpela wara ol i kolim Pool of Re stap long makim Australia Woa Memorial long Kenbera long Oktoba 13.



**Painim abus**: WANPELA wait pointa sak i wok long pinisim laik bilong em long ol hap mit bilong wanpela weil pis i bin dai long Westen Australia long Tunde dispela wik. Wanpela hap bilong nambis ol i pasim long banisim gut ol lain manmeri i go waswas long nambis.



**Wol Mastas Gems i pulim planti tausen**: SAMPELA tausen manmeri i bung i 2009 Wol Mastas Gems long Oktoba 11, 2009.



Ol dispela pikinini of Reflection. Em i



**Soyuz i pundaun gut long Kazakhstan:** SPES BALUS Soyuz TMA-14 i bin pundaun gut long taun Arkalyk, long Kazakhstan. Insait em Ekspedisin 20 Komanda Gennady Padalka, Flait Enjinia Michael Barratt, na wanpela spes turis bilong Keneda em biliane man Guy Laliberte. Padalka na Barratt i bin kam bek bihain long ol i stap siks mun long Intanesenel Spes Stesin, wantaim Laliberte husat i bin kamap painim ol long stesin long Oktoba 2.



**Redi long Wol Wasim Han De:** OL skul sumatin i wasim han bilong ol long redi long Global Wasim han De long Lima long kantri Peru long Mande dispela wik. Oktoba 15 em de Yunaitet Nesens i makim olsem Wol Wasim han De. Ol i bin makim long 2008 taim ol i tok em i yia bilong Intanesenel Yia bilong Sanitesen o stap klin pasin.



ng insait long Olimpik Stedium long Sidni long opening seremoni bilong Sidni



**Wilwil i go long wok:** WANPELA man i ronim wilwil bilong em i go long wok long Melbon long makim 'National Ride to Work Day' o nesanel de bilong ronim wilwil i go long wok. Dispela de em bilong mekim olgeta wokmanmeri i mas ronim wilwil i go long wok, na long lusim ol kar bilong ol i stap long haus long dispela de.



Redio Program

Program bilong Wanwan De Mande - Fraide

6am - 10am - Sankamap show - Host: KAS.T
6:15am - Komuniti Notis Bod
6:30am - Nius Hettains / Bondei grittings
Trukai Rais - GES FAIA KOMPETISEN
6:45am - Niuspepa Hettains
7:00am - Major Nius Bulletin - YUMIFM Nius Senta
7:15am - Toktok sapatim LO na JASTIS Sekta
7:30am - Trukai Rais - GES FAIA KOMPETISEN
8:00am - Major Nius Bulletin - YUMIFM Nius Senta
8:15am - Stori b'long Skelim Tingling

8:30am - Trukai Rais - GES FAIA KOMPETISEN
9:00am - Nius Bulletin - YUMIFM Nius Senta
9:15am - Luksave long Komuniti (Redio Pilai)
9:30am - Trukai Rais - GES FAIA KOMPETISEN
9:45am - YUMI PAINIM WOK Segment
10:00am - Nius - YUMIFM Nius Senta
10am - 2pm - Monin Trek na Belo Pack - Host: VAVIESSIE
10:10am - Lukatim yu yet - Helt toktok - RH Hyper Mart
10:45am - YUMI PAINIM WOK Segment
11:00am - Nius - YUMIFM Nius Senta
11:10am - Cont'd - Lukauti yu yet - Helt toktok
11:30am - Nius Hettains b'long Belo Taim
12:00pm - Major Nius Bulletin - YUMIFM Nius Senta
12:10pm - BELO Taim - wantaim sapat b'long TELIKOM
12:15pm - Komuniti Notis Bod
12:20pm - BELO Taim - wantaim sapat b'long TELIKOM
1:00pm - Nius - YUMIFM Nius Senta
1:10pm - BELO Taim - wantaim sapat b'long TELIKOM

2:00pm - Major Nius Bulletin - YUMIFM Nius Senta
2pm - 6pm - Avinun Draiv Taim - Host: Enjo Dabix
2:00pm - 4:00pm (Tunde / Fonde) TOKAUT TOKSTRET
2:45pm - YUMI PAINIM WOK Segment
3:00pm - Nius - YUMIFM Nius Senta
3:10pm - Avinun cruz
4:00pm - Nius - YUMIFM Senta
4:10pm - "FOAPELA KAM GUD LONG 4"
4:30pm - Nius Hettains
4:45pm - YUMI PANIM WOK Segment
5:00pm - MAJOR NIUS BULLETIN - YUMIFM Nius Senta
5:10pm - 6:00pm - FLAME KULCHA (1 hr) listeners request
6:00pm - MAJOR NIUS BULLETIN - YUMIFM Nius Senta
6 - 7pm - Maggi noodles request aua
6pm - 00am - NAIT BEAT - Host: ANGRA KENNEDY
6:10pm - 7:00pm Mun kamap sho
6:45pm - Komuniti Notis Bod
7:00pm - 9:00pm - COCA COLA GARAMUT

9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW - Host: Papa Raegs / Sally / Nenge
00:00 - Early Monin Taim Cruz (ol lain brukim tulait shift)
- Musik / Request / Tok pilai
- Kipim Kampani long ol nait shift.
Weekend Shift - Saturday & Sunday
6:00am - 11:00am - Wiken Sanrais
6:30am - Komuniti Notis Bod - Bondei grittings
7am - 9am - Wiken Spots
9am - 11am - Monin Raun
11am - 1pm - National Weekly Hit Parade (Host Kas.T)
2pm - 6pm - Sarere Avinun Draiv
6pm - 00am - Nait Beat (Host Angra Kennedy)
YUMIFM POROMAN TEAM:
Turner (KAS.T) Arifeae - Team Leader / Program Director
Angra KENNEDY - Senior Announcer

Raun wantaim Wantok

Wiken bilong amamas

Nicky Bernard i raitim

DISPELA wiken long NCD o bikpela siti bilong yumi Pot Mosbi, bai gat planti kainkain bikpela pilai bai kamap.

Long sait bilong Ragbi bai lukim tupela strongpela tim bilong BMobile Inta siti kap bai brukim bun long husat bai kisim taitol bilong dispela yia, pilai bai stap namel long ol mangi nambis, Rabaul Guria, na ol mangi long bikpela maunten Enga Mioks.

Long ol narapela pilai, ol nius manmeri bai go insait long fainol bilong ol long Media Snuka Resis bilong ol long dispela Sarere long bikpela hotel Lamana.

Dispela em bai bikpela amamas long ol Nius man-

meri long wanem ol i kilim skin long 23 Sarere olgeta na dispela em amamas bilong fainol bai no inap liklik.

I gat 12-pela tim bai stap insait long fainol bihain long ol narapela tim i no mekim i go tru long fainol dispela yia, long wanem i gat 24 tim olgeta insait long dispela kopetisen.

Long yia i go pinis, i bin gat 16-pela tim na amamas bilong em i bikpela moa na tu em ol nius manmeri tasol i bin wokim tim bilong ol na gem i bin swit nogut tru, tenkyu i go long Telikom na Lamana long sponza bilong ol na mekim dispela kompetisen long ol yia i go pinis i kamap bikpela tru, na i pulim planti tim dispela yia wantaim 24 tim olgeta.

12-pela tim nau bai stap insait long fainol em long, Kool Grafex Kundu 2, Ad Signs 2Fast Sunday Chronicle, Blue Grass Parliament Tambaran, Business Times, Monier Allied Media Council, CBS Spin Doctors, NCDC City Sivarai, NGCB Niusmakers, CSH Poi Nangu, IPA, Mondo Petromin Snax Wantok na CPL.

Dispela ol 12-pela tim bai soim tru kala bilong ol long dispela Sarere long husat bai strong long go long Oktoba 31 long gren fainol.

Bikpela tok tenkyu bai go long ol tripela bikpela sponza wantaim ol liklik sponza bilong dispela kompetisen, Telikom PNG, Nesenel Geming Bod, Nesenel Brotkast-ing Koperesen (Kundu 2) ol sapat sponza em NCDC, Lamana Hotel, Niugini Table Birds, 2Fast Motors na CPL.

Long wankain taim tu i go long sponza bilong wanwan tim husat i helpim ol dispela 24 tim wantaim yunifom na sampela liklik samting.

Long yia antap bai lukim olsem sampela tim bai no inap stap insait long dispela kompetisen long wanem sampela i save sot long manmeri bilong pilai na tu planti tim na pilai i stap longpela taim tru.

Man i go pas long pilai i tok, dispela kompetisen i longpela tumas na yia i kam bai ol i daunim sampela tim na tu lukluk gut long media manmeri stret long pilai long dispela kompetisen bilong ol yet.



WOKIM SAMTING STRET: Tim bilong Wantok Niuspepa i redi long 'wokim samting stret' insait long fainols. Ol sponza bilong Wantok em Petromin, Mondo Used Clothing na Lae Biscuit Snax. Foto: James Kila

RADIO AUSTRALIA TOK PISIN PROGRAM HARIM LONG: 101.9 FM

Table listing radio programs for Radio Australia Tok Pisin Program - Mande, including Morning - Nait, TUNDE, TRINDE, FONDE, and FRAIDE sections with time slots and program titles.



National Weekly Hit Parade:

Sponsor: Digicel - bigger, better network
Produced & Host by: Kas.T
Statistics: Enjo Dabix & Poroman Crew

Week Ending: Saturday - 17th October 2009

Table with columns W/B, L/W, D/Wik, Singing, and Artist, listing the top 20 songs from the National Weekly Hit Parade.

Song In: Egu Lalogau Gou Gaoma
Song Out: Sunam girl Giveway string band

TV GAID

FONDE OKTOBA 15, 2009

Table listing TV programs for the Fonde (Friday) of October 15, 2009, including JOYCE MEYER, TODAY, and NATIONAL EMTV NEWS.

You Wanna Dance" 10.00PM M THE STRIP Drama Series, The Strip - centres on the Criminal Investigation Bureau (CIB), a small and elite group of detectives who investigate the major crimes in Australia's playground of excess. - Stars: Aaron Jeffrey & Frankie J. Holden.
11.00PM G NATIONAL EMTV NEWS REPLAY
11.30PM Australia Network

FRAIDE OKTOBA 16, 2009

Table listing TV programs for the Fraide (Friday) of October 16, 2009, including JOYCE MEYER, TODAY, and NATIONAL EMTV NEWS.

5.00PM G THE SHAK
5.29PM G EMTV NEWS UPDATE
5.30PM G HOT SOURCE
5.55PM G CRIME STOPPERS
6:00PM G NATIONAL EMTV NEWS
6.30PM G A CURRENT AFFAIR
6.59PM G NEWS UPDATE IN TOK PISIN
7.00PM G IN MORESBY TONIGHT
All the latest in entertainment and arts around Port Moresby, and PNG, with a special feature segments, a weekly studio guest and a weekly highlights of what's on your screen.
7.27PM EMTV TOK SAVE
7.30PM PG 20 TO 1:2 Billion Dollar Ideas Tonight we count down some modern inventions we can't live without. From just an idea - to a billion dollar industry - these inventions changed the world forever. Hosted by TV legend Bert Newton.
8.30PM PG THE SIMPSONS
9.00PM M FRIDAY NIGHT MOVIE: GET CARTER - (2000) Action-Crime/Drama/Thriller - Jack Carter, a mob enforcer living in Las Vegas, travels back to his hometown of Seattle for his brother's funeral. During this visit, Carter realises that the death of his brother was not accidental,

but a murder. With this knowledge, Carter sets out to kill all those responsible. Stars: Sylvester Stallone.
11.30PM G NATIONAL EMTV NEWS REPLAY
Midnight Australia Network

SARERE OKTOBA 17, 2009

Table listing TV programs for the Sarere (Saturday) of October 17, 2009, including STATION OPEN, THE MUSIC JUNGLE, and ENGLISH SUPER LEAGUE.

Table listing TV programs for the Sarere (Saturday) of October 17, 2009, including EMTV TOK SAVE, MORESBY TONIGHT, and NATIONAL EMTV NEWS REPLAY.

SANDE OKTOBA 18, 2009

Table listing TV programs for the Sande (Sunday) of October 18, 2009, including IT IS WRITTEN, HILLSONG, and ENCORE PRESENTATION.

Grid of letters for the word search puzzle.

Word list for the word search puzzle.

Number grid for the crossword puzzle.

Sudoku puzzle grid.

SUDOKU bilong las wik isu...

Grid for the word search puzzle.

PAINIM NEM bilong las wik isu...

TORO



BIABIA



KANAGE



TOKWIN... Raskol painim wok tru... Wanpela dokta long ovasis kantri i kam long helpim mipela long daunim sik kolera long Lae.

Mipela i no hangere... Toktok long Post Courier las wik i kamap olsem ol lain long "Ailan ov Lav" i nidim halivim bilong yumi.

long Bombex tu? Nogat toksave na mipela ol sitisen bilong Mosbi i wari liklik. Hariap na kisim bek ol kalabus!

TV GAID

TV program schedule for Monday, October 19, 2009, and Tuesday, October 20, 2009.

# Tambul i gat planti gutpela stori

**James Kila i raitim**

**P**LES Tambul insait long Westen Hailans provins i stap gut tru aninit tasol long bikpela maunten Giluwe. Dispela namba-tu bikpela maunten insait long PNG i stap stret long boda bilong Westen Hailans na Sauten Hailans provins. Long sait long edministresin, dispela Tambul i kam aninit long Westen Hailans provins.

Long samting olsem 1-kilok long apinun kol save stat long kamap, na sore tru sapos yu nupela man o meri long go long dispela Tambul stesin, kol bai go kisim bun bilong yu stret.

Moabeta yu putim strongpela kol-siot na yu bai ino inap pilim stret strongpela kol bilong Tambul, we i stat long Maunten Giluwe na i kamdaun long traim long pilim bodi bilong yu.

Klaut i save pasim het bilong Maunten Giluwe long moning igo inap samting olsem 10-kilok. Na bihain olsem 1-kilok klaut i save pasim het het bilong dispela maunten. Taim yu raun long Tambul stesin bai yu ken lukim gut tru het bilong Mauten Giluwe we i stap ples klia tru na gutpela sans tu long kisim poto.

Mi bin mekim wok raun igo long Tambul stesin long las tupela wiki go pinis wantaim sampela ol lain niusman long kisim ripot bilong Fres Prodius Developmen Ejensi (FPDA) husat putim aut o launsim 24-pela nupela skin haus bilong groim ol kru bilong poteto insait long wanpela projek long Tambul stesin. Dispela em wanpela gutpela projek na developmen i kamap long dispela rurel distrik long PNG na tok amamas i mas go long FPDA long kamapim dispela.

Dispela wokabaut igo long Tambul ino nambawan taim bilong mi. Mi bin go long Tambul stesin long yia 2005 wantaim wanpela poroman husat em wanpela kopi-saveman o saintis bilong Kofi Industri Koporesin (CIC). Nem bilong dispela brata em Pamenda Talopa. Turangu brata ya i bin dai long Australia taim kar em i draivim i bin bam.

Long 2005 mi bin helpim Mista Taloba long kisim ol piksa na mekim ol ripot bilong wanpela projek bilong em long wok bilong diwai yar 'Lucynae'. Mista Talopa yet em wanpela saveman bilong wanpela liklik ples klostu long Tambul stesin.

Long dispela taim mi bin go long Tambul stesin long yia 2005 em mi yet i lukim olsem stesin ino bin gat planti ol nupela senis. Planti ol pipel i strong long mekim wok bilong ol yet na gavman sevises ino go strong tumas long dispela ples.

## Plantu gutpela senis i kamap long Tambul stesin

Dispela raun bilong mi wantaim ol narapela nius-lain i go long Tambul stesin i bin kamap wanpela wik tasol bihain long Praim Minista Se Michael Somare i bin go long dispela ples long tokaut long sampela ol wok developmen long Tambul-Nebilyer distrik.

Praim Minista Se Michael i bin go long Tambul tu long opim ol nupela haus bilong ol wokman na tu Tambul-Nebilyer Distrik treseri opis.

Dispela raun bilong Praim Minista em MP bilong Tambul yet, Benjamin Poponawa i bin oge-naisim na tru tumas planti ol lain tru long narapela hap bilong distrik na tu sampela lain long Mt Hagen i bin pulim lain tru long rot i go long Tambul stesin long lukim dispela seremoni.

Yes, taim yumi skelim developmen em taim yumi lukim sampela kain senis i kamap long distrik hetkwata. Mi ken tok olsem Tambul stesin, we nau em distrik hetkwata bilong Tambul Nebilyer i gat planti ol gutpela senis tru.

Mipela i bin sanap raun long Tambul insait long ol gaden bilong ol lain long Nesinol Agrikalsa Risets Institiut (NARI) na mipela i ken ring long Digicel mobail telefon bilong mipela igo long Mosbi na tu long Madang na Goroka long toktok long ol femili bilong mipela. Yes, dispela em trupela sain bilong developmen.

Tru tumas planti ol nupela wok developmen na senis i kamap insait long Tambul stesin na dispela i mekim ples i luk nais tru.

Long pastaim tru mi bin raun igo long dispela ples long yia 2005, dispela ples ino luk olsem. Tasol nau Tambul Stesin i lukim senis na luk nais tru.

## Tambul pipel em ol hatwok lain

Insait long wokabaut bilong mi igo long Tambul mi bin gat sans long stori wantaim planti ol lain na mi kisim planti gutpela stori long ol



AMAMAS: Ol sumatin bilong Tambul i mas long welkam long ol lain bilong FPDA na lokol MP bilong ol.

pipel long dispela ples.

Mi bin stori wantaim wanpela bikman bilong ples Tomba. Dispela ples i stap long maus-rot igo insait long Tambul na em i stori gut tru long mi olsem em i save groim poteto, kerot, brokoli, kauliflawa na ol narapela kumu we i save gro gut long kol ples na i save go salim long ol narapela ples insait long kantri.

Dispela bikman i stori long mi tu olsem em i gat tupelo PMV bas we i save ron long Okuk Haiwe igo daun stat long Mt Hagen igo daun long Lae.

Em i tokim mi tu olsem em i gat wanpela PMV bas tu we i ron long Mosbi siti. Em i givim long wanpela pikinini man bilong em na dispela man i ronim bisnis long Mosbi i stap.

Long 2005 mi bin paul liklik long toktok bilong dispela bikman na bihain mi go askim dispela poroman Mista Pamenda Talopa, na em i tokim mi olsem "Yes, em i tru, planti ol lain long hia long Tomba na Tambul e mol lain bilong wok stret na planti bilong ol i gat ol PMV bas nau i save mekim wok bisnis long Mt Hagen, Mosbi, La na tu ron igo kam long Okuk Haiwe," Mista Talopa i tok.

Long las wik tasol, mi bin kalap long wanpela teksi long Waigani long Mosbi bihain long wok na mi tokim draiva long go lusim mi long Renbo Estet. Taim mipela i ron yet mipela i stat long stori igo na mi askim yu bilong we na em tok "Brat mi bilong Tambul".

Na mi tokim stret, "Brat yu trupla man, mi harim planti stori bilong yupela ol Tambul na mi amamas lons stori wantaim yu,"

Yes, dispela bikman i tokim mi olsem nau yet em i save stap long ples na gohet tasol long wokim gaden na groim ol gaden kaikai. Na planti ol lain Tambul pipel i gohet yet long groim ol fres kaikai na bisi tru long mekim mani na ronim bisnis bilong ol.

## Fres gaden kaikai prais daunbilu tru

Wanpela gutpela samting long Tambul em olsem prais bilong ol fres gaden kaikai ino dia tumas.



DIVELOPMEN: Plantu nupela developmen i wok long kamap long Tambul stesin olsem dispela nupela distrik edministresin opis. Poto: James Kila



NAIS PLES: Het bilong Mauten Giluwe i stap ples klia tru antap long Tambul stesin. Poto: James Kila

Tru tumas prais bilong ol kaikai olsem brokoli, poteto, koliflawa na ol kapis em daunbilu tru. Na sapos yu man bilong ples olsem Mosbi yu raun igo long dispela ples, ating bai yu guria tru na tingting i paul olgeta.

Yes, Tambul em wanpela ples insait long PNG we lokal MP bilong ol Mista Poponawa i mekim gutpela wok tru long stretim distrik stesin long pulim pawa, bringim sola-sistem na stretim ol haus

bilong ol gavman wokman meri na dispela em trupela sain bilong developmen.

Mi yet mi krungutum Tambul stesin we em hetkwata bilong Tambul-Nebilyer distrik long Westen Hailans provins na mi luksave olsem ating ol narapela lida o MP long narapela distrik i putim gutpela tingting long kamapim developmen, ating distrik bilong ol bai luk gutpela na developmen na gavman sevises i ken kamap gut na ol manmeri i ken amamas.



# Senis wantaim taim

## Mi na sista bilong mi Ludwina

**M**I yet wantaim sista bilong mi Ludwina em papa na mama i save lukautim mitupela gut tru na mitupela i gat planti kaikai na mitupela i ken raun na pilai long laik bilong mitupela. Mitupela i gat olgeta fridom na olgeta pikinini i save laik kam painim mitupela na pilai wantaim mitupela.

Mama bilong mitupela em i meri tasol em i sempion meri bilong kilim kapul na wel pik. Em i kisim blut bilong papa na ol tumbuna bilong em, em i meri bilong Powai wan, em ol lain i stap long bik bus na serim boda wantaim ol Kari, Buyang, Kawa, Worei na Lohii olsem na mama bilong mitupela i gat famili long olgeta dispela ples tasol long skul bilong ol tumbuna, mipela i nogat rait long save tumas long lain famili bilong sait bilong mama, mipela i mas save tasol long lain bilong papa bilong mipela. Papa bilong mitupela tu em i man bilong kilim kapul na em i sempion tru bilong holim maleu long wara. Mi gat tupela liklik brata na sista George na Denisius tasol tupela i liklik yet na i save stap wantaim mama oltaim.

Mipela i no save sot long kaikai na abus na planti taim mitupela sista bilong mi i save kisim ol planti pikinini i lus nating namel long ples i kam long haus bilong papa mama na kaikai wantaim mipela. Tasol olgeta dispela gutpela samt-ing klostu nau bai senis na mi no bin save.

Plantu taim mipela i save bung long bikpela grup tru na ol bikpela pikinini man i save mekim mi karim ol klos bilong ol taim ol i go antap long diwai na kalap-kalap long wanpela diwai i go long narapela. I gat planti rop na lip diwai antap na i no isi long wanpela mangi i pudaun tasol ol bikpela mangi i save raf-raf na sampela taim ol i save traime tromoi wanpela narapela long het bilong diwai i kam daun. Sapos wanpela mangi i pundaun, olgeta i save tok em i "kuk boi" na wok bilong em long karim olgeta klos bilong ol narapela taim ol i wok long pilai long bus. Ples bilong mipela i gat planti wail abus na planti taim ol mangi i save bungim kapul taim ol i pilai na ol i save kilim. Plantu taim ol i kukim yet long bus na mipela olgeta i kaikai. Olgeta mangi i save mekim dispela kain pasin inap mipela i bungim sinek o bikpela wail palai, orait, mipela i save stop na ronowe i go bek long ples. Sampela taim mipela i save pilai inap tudak o inap papa mama i singaut. Sapos papa mama i singaut em mipela olgeta i save - trabel- mipela olgeta bai kisim stik bikos mipela i pilai i go inap tudak.

Sampela taim wanpela mangi bai yusim pinga bilong em long rulim wanpela lain long wesana singautim mipela olgeta long kam lain na ol i save kauntim, wan redi,



Jada 091

tu redi, go! Na mipela olgeta i save ron spit tru i go long narapela sait. Plantu bilong mipela i nogat laplap. Mi yet mi gat wanpela hap laplap kala bilong em i hait pinis bikos mi no save wanem las taim mama i wasim. Dispela laplap em i olupela tru na i brukbruk mi no save husat i givim mi. Dispela laplap em mi save yusim olsem klos bilong pasim namel long mi long karamapim liklik 'wiwi' na has bilong mi na seim taim dispela laplap em i save kamap olsem blanket bilong mi long nait. Taim ol mangi i resis, dispela laplap i save lus long laik bilong em na mi save hangamapim long tit na ron.

I save gat sisen bilong kainkain pilai. Long taim bilong pilai mabel mipela i no sot long ol sid bilong kalapulim na ol narapela diwai long nambis. Mipela i save mekim ring na bikpela grup pikinini man i save bung na pilai. Plantu taim mipela liklik i save sindaun na lainim pasin bilong pasim spia bilong sutim pis na mipela yet i save mekim spia na go sanap long het bilong rip na was long pis. Sampela mangi i nogat spia ol i save kisim spia bilong bikpela brata bilong ol na sutim pis. Plantu taim mipela i save kambek wantaim liklik pis na olgeta spia i krungut pinis na ol bikpela brata i save kilim mipela stret.

Ol pikinini meri i save bung na traim long kukim kaikai, mekim basket na wokim giaman maket. Ol i no save stap longtaim bikos ol bikpela mangi man i save kam na brukim banis bilong ol pikinini meri na tu ol papa mama i save singaut na ol pikinini meri i save go bek hariap long ples. Sapos wanpela pikinini meri i raun yet i go tudak orait em yet i save pulim plantu toktok, papa mama papa i save paitim.

Sampela taim mipela olgeta pikinini yet i save bung na holim ol hap sospen i krukut na bruk-bruk, hap naip bilong papa mama na

mipela i save go long ol liklik wara bihain long ples na yusim lek bilong mipela long mekim plantu doti long wara. Dispela i mekim ol liklik pis, kindam, maleu na kuka i painim klinpela wara na ol i save kam antap long wara na putim nus bilong ol long pulim win. Orait mipela i save holim o kilim na bihain mipela olgeta i save go kukim long nambis na kaikai wantaim.

Mipela i gat plantu gutpela pilai. Ol lain i bikpela liklik ol i save drip-drip i go aut long bikpela grup na mipela i no save ol i mekim wanem kain pilai, man na meri wantaim.

Taim ol papa mama i go stap long bus longpela taim tru mipela olgeta pikinini i save wet inap Fraide avinun long ol bikpela brata sista i pinis long skul, orait mipela olgeta i save bung na wokobaut i go painim papa mama. Ol bikpela i save lidim mipela na plantu taim mipela i krosim ol bikpela wara i gat pukpuk, wara i gat tait, bikpela win, taim nogut, taim bilong ren, plantu rop nil, mambu, paspas na bikpela sinek long rot o nait i bungim mipela, mipela i save kamap yet long papa mama bilong mipela. Mi save amamas tru long taim ol papa mama i kem long bus longpela taim bikos taim mipela pikinini i kamap i save gat plantu pis, kapul, mit bilong wel pik, maleu na kainkain abus ol papa mama i smukim na drai pinis bilong mipela pikinini i kaikai long laik bilong mipela.

Ol dispela gutpela pilai i laik senis na mi no bin save inap sampela taim bihain.

Ol wan famili bilong mitupela Ludwina

Taim mi wok long groap mi nogat aida long husat i reletiv o wanfamili na husat i no wanfamili bilong mi. Tingting bilong mi em olgeta lain i wanlain bilong mi. I tru mama i save slipim mi long lek bilong em taim em i painim laus long het bilong mi na toktok isi

long ia bilong mi long husat i trupela brata na sista bilong em. Tasol wankain olsem olgeta mama, em i nonap larim mi pilai nating wantaim pikinini bilong ol narapela lain. Long ol toktok mama i mekim mi klia liklik olsem wanpela brata bilong mama em i skul long Mongop haikul long Kavieng na nau em i stap long tisa kolis long sampela hap bilong Rabaul tasol mi no klia Kavieng na Rabaul i stap we. Wanpela sista bilong mama tu em i liklik yangpela meri na i stap wantaim mipela. Mama wantaim papa bilong mi i lukautim em taim mama bilong em i dai na em i gat tripela krismas tasol. Dispela liklik meri i bin statim skul long ples na bihain wanpela tisa bilong Baluan ailan i kisim em i go stap wantaim ol na long taim mi gat save liklik, ol suster bilong Katolik sios i kam kisim em i go skul long Bundralis long not kos bilong Manus. Bihain long skul long Bundralis, dispela yangpela meri i joinim OLSH oda na kamap suster bilong Katolik sios.

Mama i tok mi gat sampela kandre long Powai wan, long M'Buke na long T'Moenai tasol mi no klia tumas long olgeta yet. Mi save tasol long wanpela kandre bilong mi Chikak em i save stap long ples Olowai bihain long maunten Sapumu. Yes, mi no lusim tingting long tupela liklik kandre na anti bilong mi long ples, em Mutan na Melewen.

Patu em i Katolik misin stesen na em i het paris bilong olgeta liklik Katolik paris long saut kos olsem na long taim bilong ol bikpela fis de bilong sios olgeta man, meri na pikinini bilong Powai, N'drehet, Baluan, Worei, Sohoneriu, Hat wara, Kambos, Londruw na Pao i save kam bung long Patu. Wanpela krismas taim mipela olgeta lain bilong ol dispela ples i stap long Paru Katolik misin long mekim bikpela lotu bilong krismas. Taim lotu i pinis papa

bilong mi i singautim mi i go na soim mi long wanpela niupela famili mi no save lukim ol bifo. Papa i tok dispela em famili bilong 'bikpela papa' bilong mitupela Ludwina. Dispela em i namba wan taim mi lukim bikpela brata bilong papa bilong mi 'Vincent Kanau' wantaim meri na tupela pikinini bilong em i kam long ples. Vincent em i tisa bilong Katolik misin na ol i save tis long Niu Ailen na nau ol i trenfea i kam long ples. Mi gat mix filing, mi no klia bai mi amamas o mi tingting plantu bikos mi no save gut long dispela 'bikpela papa' bilong mi na tupela brata na sista bilong mi. Krismas lotu i pinis na mipela olgeta i go bek long ples. Bikos ol i tok dispela em i bikpela papa bilong mi, mi laik save moa yet long em wantaim ol brata na sista bilong mi.

Vincent em i bikpela brata bilong papa bilong mi na tupela i em ol namba wan papagraun bilong ples Chapasa. Tupela i bin liklik mangi yet na ol Powai i kam painim wanpela lepra man long kisim tok orait long kirapim nupela ples long dispela eria.

Long ples Vincent i gat tupela haus, wanpela em haus tisa na i stap long banis bilong Chapasa praimeru skul na narapel em long hauslain we em i gat haus kopra na bikpela banis. Plantu taim mi save go long haus bilong ol long banis bilong skul na meri bilong Kanau i save kukim gutpela kaikai em i save grisim long kokonas na mi save laik pinisim olgeta sup tasol mi save sem. Mi sem bikos hia ol i lainim mi long kaikai wantaim spun na kaikai bilong mi i stap long 'plet simen'. Taim ol i mekim olsem mi filim olsem olgeta ai i lukluk strong long mi na enitaim bai spun i pudaun nating long han bilong mi na pairap long limbung, o i pundaun i go olgeta ananit long haus.

Wankain olsem ol pikinini long ples kanaka, mi save tasol long yusim pinga bilong mi long kaikai. Olgeta taim mama bilong mi save skelim kaikai bilong mi long plet kapa na sapos i gat ol narapela man tu long haus, mama i save putim kaikai bilong mi long banana lip na mi save amamas tru. Sup bilong mi na bilong olgeta narapela lain tu em mama i save skelim long sel kokonas, na hia man, long haus bilong bikpela papa bilong mi, ol i skelim kaikai bilong mi long simen plet na sup bilong mi i stap long kap kapa na mi kaikai long spun, mi ting mi stap pinis long heven!

Pastaim long mi bungim bikpela papa bilong mi, mi ting olsem olgeta lain yet i lain bilong mi tasol, na papa na mama bilong mi em tupela best wanfamili mi gat, i nogat narapela moa. Mi no bin save olsem mi gat ol narapela na trupela wanfamili tu.

**Neks Wik: Sik  
Lepra em wanem?**

# Raun wantaim Kanage olgeta wik

## Kros long beltait

**W**ANPELA moning, papa Kanage go wok long gaden. Em wok i go na hangere kisim em. Em kam bek long haus na meri bilong em skelim kaikai bilong em. Kanage kaikai pinis na em tokim meri na pikinini meri bilong em, "yu tupela i go na karim ol paiawut mi brukim pinis na i stap long gaden". Pikinini meri bilong em les. Papa Kanage belhat na em tokim em, "Yu les long wanem! Bai yu stap tasol olsem! Bihain yu marit, man bilong yu bai mekimsave long yu long dispela kain pasin". Mama harim Kanage hatim pikinini meri na em tokim Kanage, "Inap ya! Maski long kros". Papa Kanage tanim em tokim mama, "Mi gat rait long kros na skulim em long wok. Yu noken tokim mi long pasim maus. Yu tupela les long mi kros, orait, yu tupela i go na painim rot long kaikai na kisim mani!"

P Posou  
Manus

## Rais i no kuk yet...

**K**ANAGE i stap wantaim meri bilong em longpela taim nau. Wanpela apinun, meri bilong Kanage i redim pot kaikai na putim long paia. Meri hariap i go waswas bikos em ples i hot. Em tokim Kanage long was long pot kaikai long paia. Em i go waswas na em lus tingting long kisim sop. Em i go antap long kisim sop na lek bilong em i wel na turangu hariap holim sait long haus. Tasol tauli lus. Kanage lukim olsem na em i opim ai na tok, "Aiyo...., rais i no kuk yet na Ox & Palm op pinis...".

Soulist Raiiozts  
Madang

## Pasim meri pikinini

**T**AIM bilong ileksen na ol kainkain kendidet i go kempen long ples bilong Kanage. Kanage pinis long gaden na wok-about i kam daun long rot na lukim planti kar i ron wantaim ol manmeri antap na singaut wantaim i go long ples. Taim Kanage i wokabout i kam, wanpela kendidet i singaut long Kanage, hei paps, inap yu pasim meri pikinini bilong yu na givim long mi. Em i min long pasim vot na givim long em. Tasol lapun Kanage i bel kaskas na tokim kendidet ya 'Yu yet pasim bilong yu na givim i kam na bai vot i go long yu'

Mambu  
Wantok Bilong Yu Yet

## Inglis em yu ya

**S**IPI em wanpela lapun man na em i no skul long bipo. Tasol oltaim em laik tok inglis. Olsem na taim em i raun na harim ol manmeri i tok inglis, em save lokim tasol long het na stap. Wanpela taim em sindaun wantaim Kanage na pikinini bilong em i bik het. Kanage tokim pikinini long stap isi tasol pikinini tanim na bikmaus long



Kanage. Sipi bel hat olgeta na singaut long tok inglis, "Hey Son! Don't you off the maus to your father. I you father grow you big!" Kanage i laik paitim pikinini bilong em tasol isi em lusim em i go na lap stret long toktok bilong Sipi.

J Baiwara  
Mosbi

## "I come from the stua"

**W**ANPELA moning Kanage i go baim tinpis long stua na wokabout i kam bek na bungim wanpela waitman long rot. Waitman i kirap na tok moning long Kanage. Waitman ya askim Kanage, "Where did you come from?" Kanage i bekim, "I come from the stua". Waitman askim gen, "What did you do there?" Stail Kanage bekim, "To bought a tinpis". Waitman askim la taim, "What are you going to do with that tinpis?" Kanage bekim las wan, "Jas to eat angens the rais!"

LT  
Kavieng

## Kidim feelings

**P**APAS Kanage em bilong Suon ples long Erap, Morobe Provins. Wanpela taim ol

lain bilong em long Kimbe salim tok long em long kam raun lukim ol. Kanage i go kisim ol lip brus bilong em long gaden na pasim ol redi long go long Kimbe. Lapun Kanage kalap long sip na i go long Kimbe. Wanpela de, lapun Kanage kisim ol lip brus bilong em na i go long maket long salim. Long maket, lapun Kanage lukim wanpela yangpela meri. Lapun Kanage trai lek na wok long wokim ai long meri i stap. Meri ya i no bisi long Kanage na em wokabout i go. Kanage wokabout hariap i go long baksait bilong meri ya na holim han bilong em. Meri ya kirap nogut na tok inglis: 'Hey, what's wrong with you?' Papa Kanage bekim tasol olsem: 'I jus akism yu bilong kidim feelings!' meri ya kros na tok: 'Plis, I am not your partner'. Taim lapun Kanage harim dispela toktok, papa ya paul olgeta na tok: 'That's olrait. I just want to be your pren for nau tasol'. Bekim bilong Kanage wokim na ol man meri long maket holim bel tasol na kaikai pinga.

Yabi Nain  
Erap

**Ol skwat!**  
Salim ol gutpela Kanage tok pilai i kam long:  
Kanage Tok Pilai  
P.O. Box 1982,  
Boroko, NCD  
Port Moresby.  
Bai yu i gat sans long winim "Raitman Kanage" t-siot!

**PEN PREN**

Salim i kam long:  
P.O. Box 1982  
Boroko, NCD  
Papua New Guinea

**NEM:** Jimmy Nisa  
**KRISMAS:** 17 (man)  
**ADRES:** C/- Kilipau Village, P.O Box 56, Vanimo, Sandaun Province  
**SAVE LAIKIM:** Harim musik, raitim pas, go skul, wok gaden, mekim pani

**NEM:** Awi Pani  
**KRISMAS:** 15 (man)  
**ADRES:** C/- Elo Community School, P.O Box 283, Vanimo, East Sepik Province  
**SAVE LAIKIM:** Go skul, pilai soka, raun raun, raitim pas na harim musik.

**NEM:** Mathew Kei  
**KRISMAS:** 15 (man)  
**ADRES:** C/- of Elo Community School, P.O Box 283, Vanimo, Sandaun Province  
**SAVE LAIKIM:** Pilai soka, harim musik, raitim pas, go skul na raun raun

**NEM:** Standford Anzie  
**KRISMAS:** 19 (man)  
**ADRESS:** Kanabea Catholic Mission, P.O Box 220, Kerema, Gulf Province  
**SAVE LAIKIM:** Harim musik, pilai soka, basketball, mekim pani, raitim pas na mekim pren

**NEM:** Jenice Merinere  
**KRISMAS:** 18 (meri)  
**ADRES:** C/- John Wamane, P.O Box 674, Wewak  
**SAVE LAIKIM:** Lukim TV, stori, go lotu, mekim pani na raitim pas.

**NEM:** Kama Hasu  
**KRISMAS:** 17 (meri)  
**ADRES:** Oil Palm Industry Cooperation, P.O Box 592, Kimbe, West New Britain Province  
**SAVE LAIKIM:** Pilai spot, makim pani, ritim buk, harim musik na lukim TV

**NEM:** Paulus Laumu  
**KRISMAS:** 36 (man)  
**ADRES:** P.O Box 635, Buka, ARB  
**SAVE LAIKIM:** Raitim pas, mekim pani, wok na harim musik.

**NEM:** Elvis Woni  
**KRISMAS:** 22 (man)  
**ADRES:** C/- Trevor Maiyu, Post PNG Ltd, Vanimo, Sandaun Province  
**SAVE LAIKIM:** Raitim pas, mekim pani, harim musik, pilai soka, stori na lukim TV

**NEM:** Jockey Sam  
**KRISMAS:** 18 (man)  
**ADRES:** Omati West TFI, P.O Box 184, Port Moresby, NCD  
**SAVE LAIKIM:** Raitim pas, harim musik, mekim pren, lukim TV, pilai ragbi, na volibol.

**NEM:** Sai Libi  
**KRISMAS:** 19 (man)  
**ADRES:** Ela Motors, P.O Box 3182, Lae, Morobe Province  
**SAVE LAIKIM:** Pilai Sports, raitim pas, lukim TV na mekim pren

**Painim Tok!** Raitim daun wanem pani samting yu ting i gutpela insait long babol long poto...

**BAI YU WINIM WANPELA WANTOK T-SIOT O LAPLAP!**  
Salim i kam long: Pani Toktok Kompetisen, P.O. Box 1982, Boroko, NCD Port Moresby - Sapos mipela i lukim wanem samting yu raitim i gutpela bai yu winim wanpela Wantok T-Siot o laplap na bai mipela i putim i go insait long pepa.  
Nam:.....Adres:.....  
Krisimas bilong yu:.....Telepon:.....  
Yu baim Wantok niuspapa long wanem hap:  
(Rot, Maket, Stua).....  
Kulim long hia

# “Song i makim Nesen: Painim wanpela Nesenel Antem bilong Papua Niugini”

**Namba Tri (3) hap**

DISPELA i namba wan hap bilong Painim na Rait bilong Don Niles, sinia musik man na ekting dairekta bilong Institut bilong PNG Stadi long Nesenel Entem bilong PNG... tasol long mipela dispela namba 3 hap bilong ol rait long dispela toktok.

LONG las tupela wik mipela i wok long toktok long Papua Niugini i nogat wanpela nesenel entem (nesenel song) na Nesenel Tok Promis.

Wantaim tok orait bilong man husat i raitm dispela buk, Don Niles we em i tok long buk bilong em long Papua Niugini i mas painim wanpela nesenel song we i makim ol.

Dispela buk wantaim hettok “Mak bilong kantri i stap long Song” i mekim askim long kantri i mas painim wanpela Nesenel Entem.

Maski em i no tok aut long pablik long pepa bilong em tasol bihain long 8-pela krismas dispela askim bilong em i kamap pablik.

Na dispela i mekim ol manmeri i stat long painim wanpela Nesenel Song.

Bihainim dispela wok painim kantri i kamap wantaim dispela singsing “O Yupela kirap pikinini bilong dispela ples (O Arise all you Sons of this Land).”

Don husat i wanpela Jenerel Edita bilong Yiabuk bilong ol Tumbuna Singsing i givim bikpela piksa long tok i stap hait long sampela ol nesenel song bilong wol. Dispela i strongim askim bilong em long tok bilong em olsem Papua Niugini i mas painim na mas gat Nesenel Song bilong em yet.

Long dispela Niles i rait olsem: “Ol nesenel song i save karim nek bilong kantri wankain olsem wanpela tok, piksa o pilag i karim nem bilong kantri.”

“Maski Nesenel Song i no inap long kirapim bikpela tingting bilong ol manmeri tasol long sampela em i save mekim ol i wari na tingting moa long kantri bilong ol.”

“Wanpela gutpela piksa long kain tok em long nesenel song bilong ol Siapan (Japan) em (Kimi ga yo) we mekim ol Siapan i save holim pasim gut kantri bilong ol, o long ol Rasia i mekim ol i laik kisim na lukautim nupela samting o long Israel i gat hap tok bilong Arabik i no stap na olsem Israel i narakain long ol arapela manmeri long Arab.”

Ol i save pilaim ol Nesenel Entem long taim wanpela praim minista, presiden, king o kwin bilong wanpela kantri i kamap.

I no longtaim nau ol i save pilaim ol nesenel song long ol bikpela

pilai o long makim win bilong wanpela pilaia bilong wanpela kantri.

Bikos long dispela ol manmeri i save gat luksave ol nesenel song.

Planti bilong dispela ol nesenel song i kamap long 1800 (19 senturi).

Sampela ol nesenel song i gat as tok bilong ol we i karim laik bilong manmeri long kantri bilong ol.

Ol narapela nesenel song i save karim ol toktok bilong lukluk bilong kantri bilong ol long bus graun, maunten o wanem samting kantri i gat long en.

Long kain askim wanem i mas Nesenel Song bilong Papua Niugini?

Long bekim dispela askim i hat long wanem Papua Niugini i gat planti tok ples inap olsem 830 na mak bilong populesen i stap long 2.7 milien long 1974 bipo long taim bilong Indipendens.

So wanem em askim bilong mipela.

Kamap long mak bilong Indipendens long 1971 long taim Papua Niugini i stap aninit yet long edministresen bilong Australia, PNG Haus ov Asembli i kisim wanpela flek, emblem na nem bilong kantri.

Lo tu i mas stap long lukim nem bilong kantri, emblem na nesenel song long kamap.

(Nesenel Aidentiti Oda 1971).

Bikos long dispela ol i kamapim lo long lukim dispela ol samting i kamap.

Seksen 3 bilong Mama Lo bai mas askim long kain ol samting long kamap.

Long Disemba 1 1973, PNG i kisim self-gavman long Australia na Michael Somare i kamap Sif Minista.

Long Julai, 1974 Sif Minista i askim long kamap bilong wanpela nesenel song.

Komiti i kamap we i lukim ol manmeri i raitim ol singsing bilong kamap olsem nesenel song.


Askim i go long ol manmeri long PNG na ausait wantaim long ol i raitim wanpela nesenel song long komiti i ken makim bilong kantri.

Dispela wok em tupela gavman bodi i stap bilong mekim: Opis bilong Infomesen na Nesenel Brodcasting Komisen.

Insait long hap taim yet, kabinet i tok orait long 12-pela memba komiti we dispela i lukim ol manmeri long Edukesen Dipatmen, Polis Ben, skul tisa, bipo Mis PNG na sampela moa.

Long Novemba, 1974 ol askim (tems ov referens) i kamap, ol singsing i ken kamap long wanpela bilong tripela opisel toktok em long Inglis, Tok Pisin na Motu.

Dispela singsing i no gen gat moa long 32 ba tasol i stap insait long 20-40 seken long wan-



pela ves.

Ol i ken senisim o mekim rekot long staf, long ol namba o long tep.

Komiti i givim tupela mun tasol ol manmeri i mas raitim dispela singsing. Dispela singsing i mas kam long tingting na save bilong wanpela man tasol. Manmeri i no ken stilim singsing o nek bilong narapela man o meri.

Bihain long 15 Jenuari, 1975 taim bilong salim ol singsing bai pinis.

Long dispela komiti i painim 35 singsing em ol manmeri i raitim i salim i go long komiti.

Sampela komiti i mas rausim bikos ol i no bilong wanpela man stret. Ol manmeri i stilim singsing o nek.

Wanpela bilong dispela ol singsing we komiti i rausim em “Papua Oi Natumu,” we long dispela taim i bikpela singsing long Motu na Inglis tasol nek i wankain long wanpela singsing long Inglis we i go olsem “I believe- Mi bilip” we i kam long Alexander’s Hymns Namba tri (3) na dispela i kamap long 1915.

VOT PEPA: Dispela tok pisin Vot Pepa i bin kamap long *Wantok Niuspepa* long Jun 25, 1975 long askim ol pipel long vot long makim wanpela nesenel song.

Dispela singsing em ol i yusim long 1975 long Saut Pasifik Gem long Guam na bihain ol i kisim i no olsem nesenel song tasol olsem singsing bilong Papua Besena (Papua Traib).

Em singsing bilong grup i laik bruk lain na stap bilong em yet.

Dispela singsing i tok long Papua i no laik long join wantaim noten hap bilong kantri em Niugini.

Singsing i soim mak bilong Papua i mas stap bilong em yet na Niugini i stap bilong em yet.

Na maski kain ol tingting i go pinis sampela bilong dispela ol memori i stap yet logn dispela taim.

Long Me i go inap long Julai 1975, tupela mun bipo long kantri i kisim Indipendens, olgeta nesenel niuspepa i raitim dispela singsing (nek na toktok wantaim) we 5-pela fainelis em komiti i makim.

Dispela ol singsing em LONG husat ol i kam; PAPUA Niugini ‘ EL Dorado! Papua Niugini O Yupela pikinini kirap (Arise All You Sons) na BIPO taim i no kamap (The Past Ever Etched)

Askim i go long ol rida long vot long wanpela bilong dispela

ol singsing.

Wantaim ol toktok i kamap long ol pepa, ol i pilaim nek bilong dispela ol singsing long ol radio.

Bihainim dispela ol samting ol manmeri i stat long rait i go long komiti long singsing ol i laikim long em.

Tasol planti bilong dispela ol pas i no amamas na kros ol toktok i stap long dispela ol singsing olsem dispela ol singsing i no makim stret Papua Niugini na ol pipel bilong em.

Sampela bilong dispela ol singsing em ol yusim long Viktorien Inglen long mekim ol manmeri i pilim ol i sin manmeri, i no gutpela na i daunbilo long mak bilong man we i tokim ol olsem bai i gat gutpela sindaun long bihain taim sapos ol stap gut olsem long (11 Jun 1975).

Ol toktok em ol manmeri i no laikim tu olsem singsing El Dorado o long pasin sem (O Arais). Sampela i wok long tingting long we stap em “Papua Oi Natumu.”

Long narapela wik dispela kona, Etnomusiologis Don Niles bai skruim ol toktok bilong em long rot komiti i yusim long kisim singsing “O Arais” we i no kisim stret mak bilong Nesenel Song bilong kantri.

# Gavman bai kisim gutpela mani long maining sekta

SANS bilong kantri i kisim gutpela mani long maining, petroleum na ges sekta i kamap klostu.

Gavman inap long kisim narapela K4 o 5 bilien long sekta long dispela yia na putim long 2010 Mani Plen.

Long Mani Plen bilong dispela yia Gavman i kisim olsem K4 bilien.

Long 2008 em i bin kisim K7.5 bilien long sekta.

Foapela maining kampani

Ramu Nikel, Hidden Veli, Simberi na Sinivit gol projek bai stat long salim nikel na gol bilong ol long pinis bilong dispela yia o long stat bilong narapela yia, 2010.

Dispela toksave bai kamap taim Maining na Petroleum Samba i holim bikpela kibung bilong en long Kraun Plaza Hotel long Mosbi long pinis bilong dispela mun 27 i go long 30 Oktoba.

Long taim prais bilong gol

na kopa we i bin go daun long stat bilong dispela yia bikos long hevi bilong mani long wol nau i go antap gen. Dispela i wankain long prais bilong wel.

Las wik Fraide i lukim ol papagraun long ples olsem Porebada, Boera, Papa na Lealea long Sentrel Provins we ges faktori bai kamap i sainim tok orait wantaim gavman long faktori i kamap long graun bilong ol.

Long dispela taim divelopa

ExxonMobil wantaim poroman kampani olsem Oil Search na Santos I lukluk long salim ges long 2013.

Eksekyutiv Dairekta bilong Samba Greg Anderson i tok dispela semina o kibung i kamap bilong givim sans long olgeta lain husat i pas long wok bilong maining na petroleum long ol i bung na kam save gut long ol yet.

Wanpela ges projek bai kamap long Sauten Hailans

Provins na narapela bai kamap bilong Galp Provins.

Namel long 2010 na 2013 bai lukim ol arapela projek tu bai kamap.

Dispela em long sait bilong eksplorasen na long developmen tu.

Ol projek olsem Yandera Projek long Madang, Maining aninit long solwara namel long NuAilan na Is Nu Briten na wel na ges long Douglas/Puk Puk rig long Westen Provins.

Mista Anderson i tok Samba i lukluk long 800 manmeri long kamap long dispela kibung.

Wantaim ol manmeri long indastri na gavman husat manmeri i laik kamap i ken kamap na harim ol toktok.

Long save moa manmeri i ken ringim Samba long telepon namba 321 2988 o salim imel long imel edress: conf@pngchamberminpet.com.pg.

# 30,000 BSP kastoma yusim SMS Benking

INAP olsem 30,000 manmeri nau i wok long yusim BSP SMS.

Dispela em bihain long Benk i opim dispela kain benking long het opis bilong em long Mosbi long Trinde 29 Epril, 2009.

Benk i tok long stat bilong dispela benking ol manmeri i no wet long yusim dispela kain sistem.

Nau insait long faipela mun bihain tasol long opim bilong dispela benking sistem, bikpela namba bilong ol manmeri i join na yusim dispela sistem.

Na menesmen bilong Benk i amamas long dispela bekim bilong ol kastoma bikos ol i tok dispela i soim olsem ol manmeri i redi long lukim ol senis i kamap na i save long wanem samting ol i laikim.

Menesmen i tok long

ol husat manmeri i no kisim yet SMS Benking dispela sistem i op yet na manmeri i ken ksim dispela sevis long olgeta hap, long wanem taim ol i laikim na long ol rot ol i laik long yusim dispela benking.

Wantaim SMS Benking manmeri i ken salim mani long famili, ol poroman na ol wantok maski em i no go long benk.

Yu ken sekim akaun balens na trensekse tu.

BSP SMS benking i wanpela gutpela rot bilong mekim benking. I nogat hevi, birua o stil pasin bai kamap.

Sapos manmeri i gat internet access orait ol i mas go long websait bilong benk na sait edress em [www.bsp.com.pg](http://www.bsp.com.pg) long save moa long ol tok i stap insait long dispela benking.

Taim yu rejista, yu ken

salim SMS i go long 16BSP (em olsem 16277) long kisim moa save.

Namel long dispela taim tu i gat ol hevi we sampela ol kastoma i no putim K mak o lusim tingting long putim ol mak o spes namel long ol namba.

Taim masin i lukim olsem em i no inap long bekim na olsem ol kastoma i save wet longpela taim long kisim bekim bilong ol.

Raitim krangki nem tu i save paulim masin tu.

Mak bilong trensekse long sampela ol kastoma i stap long K200 i go long K500.

Salim K5 i go bai i no inap wok.

Long amamas long bikpela namba bilong ol kastoma i yusim dispela sistem, Benk i tok tenk yu long ol.



SMS Benking: Wanpela kastoma i kisim ol pepa long ol opisa bilong Benk long raitim na yusim SMS Benking. Foto: PAUL ZUVANI

## BSP i no wok mani tasol

OLSEM wanpela komyuniti sapot wok bilong em BSP Mosbi Brens Menesa Stanerd Wai wantaim tim bilong em i makim St John Ambulens Klinik long Gordons long givim helpim bilong benk.

Long dispela wik em i givim K20,000 long stretim ol hap long klinik.

Aninit long stia bilong Wai tim bilong em i save kisim olgeta Sarere long go klinim klinik long las 3-pela wik.

Long taim bilong klinim ples tim i save lukim olsem olgeta samting we i mas stap klin i klin na nogat wanpela samting i mas bagarap.

Ol i penim tu insait na ausait bilong klinik wantaim.

Bihain long dispela wok BSP i givim ki i go long Sen John Dairekta Dokta Isaac Ake, Komisina bilong Dr. James Yamo, Dokta long Godons seremoni i kamap long 19 Septemba, 2009

Long taim bilong seremon Dokta Wai i tok dispela Doka Wai i askim ol manmeri long lukautim klinik.

Na Mista Kelson i tok amamas na tok tenk yu long Benk long mekim olsem.

Em i strongim tingting bilong Benk na em na menesmen bilong em bai mekim olgeta samting long lukautim dispela klinik.



GIVIM SAPOT: BSP stretim Gordons Kinik

# Nupela Jiwaka provins bai kisim strong long kopi na agrikalsa

James Kila i raitim

**EKONOMI o mani long ronim nupela Jiwaka provins em kopi industri na agrikalsa na strongim bihain long 2012.**

"I no gat gol, kopa, oil na ges long Jiwaka. Em kopi na agrikalsa tasol bai holim na strongim nupela Jiwaka provins."

Dispela em toktok bilong foma Kopi Industri Koporesin (CIC) bod deputi siaman, James Koimo, husat nau i wok strong long promotim wok agrikalsa insait long Jiwaka.

Mista Koimo i bin mekim dispela toktok i no long taim i go pinis bihain long CIC i laik go het long bringim wanpela nupela projek ol i kolim long 'Distrik bai Distrik Kopi Rehabilitesin Progrem' long sampela ol eria ol i makim long en insait long Jiwaka na tu long narapela ol ples insait long kantri.

Dispela CIC "Distrik bai Distrik Kopi Rehabilitesin" em i min

olsem CIC bai wok klostu wantaim ol fama grup long stretim ol kopi bilong ol long distrik we i bagarap na dispela bai helpim long kamapim gut ol kopi gaden na ol kopi diwai i ken karim gutpela seri long taim bilong kopi sisen. Moa long en, dispela projek bai helpim long givim gutpela skul long ol fama long luksave long wanem kain ol rot o wok ol i mas mekim long kopi gaden bilong ol long bringim kamapim gutpela prodaksin bilong kopi na tu kamapim gutpela kwaliti kopi.

Mista Koimo, husat nau i go pas long strongim wok bilong agrikalsa long Jiwaka i tok olsem dispela CIC projek we i bai kamap long Jiwaka em i kam long rait taim stret taim Jiwaka i laik kamap olsem provins bilong em yet.

Mista Koimo i askim ol pipel long Jiwaka long mekim gutpela yus o wok long graun bilong ol long sait bilong agrikalsa.

Em i tokaut tu olsem moa long



**I OLSEM:** FPDA elit poteto sid menesa, Paul Siwi i givim toktok long poteto sid gaden long Tambul. *Poto: James Kila*

75-pesen bilong kopo prodaksin long Westen Hailans provins long nau yet i save kam long Jiwaka.

Dispela nem 'Jiwaka' em stat long nem bilong ol ples olsem Jimi, Waghi na Kambia. Dispela ol eria nau i gat tripela distrik o

ilektoret bilong ol yet em Anglimp Saut-Waghi, North Waghi na Jimi. Na olgeta dispela tripela ples i gat naispela ol graun tru long groim ol gaden kaikai na tu kopi insait long PNG.

Sampela ol kopi fama insait

long Jiwaka eria em Wantok Niuspepa i bin toktok long ol i tok olsem ol i laikim CIC long helpim ol wantaim gutpela save na skul long kirapim bek ol kopi gaden bilong ol.

Wanpela viles extensin woka bilong FPDA, Kitto Kambauo, husat i save givim wok trening long sait bilong kamapim ol fres gaden kaikai insait long Anglimp Saut Waghi i tok tu olsem ekonomi bilong nupela Jiwaka provins bai stap long sait bilong agrikalsa. Olsem na ol yangpela manmeri i mas strong long wok gaden na groim ol gutpela gaden kaikai na salim long kisim mani long sapotim sindaun bilong ol na famili bilong ol long ples.

Mista Kambauo i tok Waghi na ol ples arere long dispela riva i gat gutpela graun tru long groim ol gutpela gaden kaikai na salim. Planti ol gutpela kaukau olsem dispela ol i save kolim 'Waghi Besta' em i save gro gut tru long dispela ol ples na swit bilong em i moa yet.

STRONGIM

**AGRIKALSA:** Man bilong Jiwaka yet Kitto Kambauo, husat save wok olsem viles extensin woka bilong FPDA long Anglimp-Saut Waghi laik strongim wok agrikalsa long ples. *Poto: James Kila*



## Tambul em 'poteto basket' bilong PNG

James Kila i raitim

**TAMBUL** insait long Westen Hailans provins em 'poteto basket' bilong Papua Niugini.

Dispela em toktok bilong Memba bilong Tambul-Nebilyer, Benjamin Poponawa ino long taim igo pinis long taim em i bin launsim 12-pela nupela skrin-haus bilong kamapim ol nupela kru bilong poteto long Tambul stesin insait long Westen Hailans provins.

Mista Poponawa i givim bikipela tok amamas igo long FPDA long bringim dispela projek igo long Tambul bikos em i tok Tambul em 'poteto kapital' bilong PNG na tu nau yet dispela ples i ken holim na strongim wok bilong industri long gohet long helpim ol narapela ples long kantri.

Tambul em i save go pas wantaim long kamapim moa

poteto insait long kantri we i save saplai long ol bikipela taun na ol eria bilong wok maining, ol hotel industri na ol bikipela stua o supamakem insait long kantri.

Ol fres kaikai we i kamaut long dispela ples em i gutpela bikos graun long Tambul em i gutpela long groim ol kaikai we i save gro gut tru long kol ples.

Dispela lonsim bilong 12-pela nupela poteto skrin haus i mekim namba igo 24-pela ol skrin haus bilong groim ol kru bilong poteto na bihain planim long gaden long kamapim ol sids long givim igo long famas insait long PNG. Dispela FPDA long Tambul bai helpim tru PNG long bringim bek poteto na bihain planim long gaden long kamapim ol sids long givim igo long famas insait long PNG. Dispela FPDA long Tambul bai helpim tru PNG long bringim bek poteto na bihain planim long gaden long kamapim ol sids long givim igo long famas insait long PNG. Dispela FPDA long Tambul bai helpim tru PNG long bringim bek poteto na bihain planim long gaden long kamapim ol sids long givim igo long famas insait long PNG.

Wanpela pastaim long FPDA i opim dispela nupela projek long Tambul, Praim

Minista Se Michael Somare i bin go long Tambul stesin we i em tokaut olsem gavman bai putim K5-milien long kirapim bek poteto industri long PNG.

Jenerol Menesa bilong FPDA, Greg Liripu wantaim siaman bilong FPDA, Fabian Chow i tok olsem dispela ol nupela skrin haus long Tambul bai helpim long bringim kambek poteto industri we i save bringim kamap olgeta yia samting olsem K100-million long helpim ekonomi bilong kantri. Planti dispela mani i save go daun long helpim ol liklik manmeri long viles na haus-lain husat i save wok strong long poteto industri.

Dispela ol nupela skrin haus tu bai helpim long strongim industri we i lukim tu sampela ples insait long kantri we i go strong tru long groim poteto.

## Kopi em laip...

Bustin Anzu i raitim

**PLANTI** manmeri i no moa tingting long planim kopi na ol i lus i go long ol bik-taun na siti long painim wok we ol i ting bai isi long kisim.

Planti tu i gat tingting olsem laip bilong taun em i isi na i no hatwok long ol ples.

Dispela tingting i pulim planti ol manmeri na ol i no moa tingting long stap long ples na lukluk long ol yet long mekim wok bilong kisim mani olsem kopi, kaukau, potato na planti ol narapela samting long graun.

Long ol dispela kaikai, kopi em wanpela bikipela samting we ol manmeri i no moa tingting long lukautim.

Long taim bilong bipo, kopi i mekim bikipela wok long developim kantri na planti senis i kamap insait long kantri.

Ol taun na siti nau i stap insait long Hailans i kisim strong long kopi na planti developmen i

bin kamap.

Tasol nau, planti ol arapela wok olsem maining, pis, loging na ol narapela samting i mekim na ol manmeri long ples we kopi i save groa long en i no moa intres.

Olsem na nau yet, prais bilong kopi i no gutpela tumas na saplai bilong kopi long Papua Niugini i drop i go daun.

Sapos dispela i tru, Papua Niugini bai stap long mak nogut long wanem long olgeta narapela samting, kopi em nambawan samting we i mekim laip bilong Papua Niugini i isi long taim bilong ol waitman.

Long wanpela man husat i save go pas wantaim kopi wantaim ol fama i bin tok long las wik olsem kopi prodaksen o saplai i go daun na dispela i soim mak nogut long kantri.

Henry Mamp, Provinsel Famas Trening Ekstensen Kodineta (Provincial Farmers Extension Coordinator) bilong Kopi Industri

Koporesin (CIC) i tok dispela em wanpela sori pasin we i kamap na em i askim ol fama long noken lus tingting long planim na lukautim kopi.

Em i bin tokim ol fama long Maunt Hagen olsem long ol 21-pela kantri we save saplaim kopi, Papua Niugini i stap 20 o seken las long lis bilong ol.

Long pastaim, Papua Niugini i save saplaim 1.2 milien beg kopi long wanpela yia na dispela i drop i go daun long 800'00 beg long wanpela yia na dispela i soim Papua Niugini i stap long mak nogut long drop i go daun.

Em i tok tu olsem kopi i save kisim samting olsem K400 milien long wanpela yia na wantaim dispela drop long saplai, Papua Niugini bai lusim dispela kain mani we em i save kisim long wanpela yia long pastaim.

Nesenel Gavman i bin givim K3milien long 15-pela fama husat i save mekim

wok bilong kopi long ol provins na strongim gen tasol dispela em i no inap long strongim saplai na groim kopi.

I gat wanpela grup i wok long stretim na laik strongim wok bilong kopi insait long provins husat i makim pinis tripela distrik insait long tripela provins we i kisim dispela luksave pinis.

Ol dispela distrik em Anglimb Saut Wagu na Nondogul long Western Hailans, Kundiawa, Gembogl na Kerowagi long Simbu, na Obura Wanenara long Isten Hailans provins.

Em i askim ol kopi growas na fama long lukautim kopi gut na mekim olsem saplai mas i stap yet long olpela level bilong em.

Em i tok ol i noken ronowe i go long ol taun na siti long painim ol wok we isi na tu les long stap long ples. Ples i gat olgeta samting i stap na ol i mas na was long kopi long wanem kopi bai lukautim ol long bihain taim bilong ol wantaim ol pikinini bilong ol.



**BAL:** Bintangor Lahanis fulbek, Sam Vera i redi long kisim bal i kam long wanpela kik bilong ol Toyota Mioks long bemobile kap semi fainol gem bilong ol las wik Sande long Mosbi. Mioks i win 18-10. *POTO: Andrew*



**BLOAP!:** Moses Loi bilong Ulamagi go antap long paitim bal i go hapsait long ol Post Courier long divisen wan semi fainol gem bilong ol long NCD volibol las wik Sarere



**SAPOT:** Ol sapoa bilong Toyota Mioks i bin amamas tru taim tim bilong ol i winim Bintangor Lahanis las wik Sande long Mosbi long go insait long gren fainol dispela Sande agensim Agmark Gurias. *POTO: Andrew Molen.*



**MASOL MAN:** Mista PNG, Lucas Wemin i bin kamap long PRL oval long Mosbi we em i mekim liklik pilai bilong em long hap taim bilong bemobile kap semi fainol gem namel long Toyota Mioks na Bintangor Lahanis. *POTO: Andrew Molen.*

**Port Moresby Soccer Association  
Gren fainol dro  
Sande Oktoba 18, 2009.**


**Telikom Park - Bisini 1**

0900	ATW Skyhawks	vs Mungkas	W1
1100	ATW Skyhawks	vs NNL Musa Utd	Y2
1300	PJB Warriors	vs CSC Thrillers	Y3
1500	Morobe United	vs Manena	D4

**Telikom Park - Bisini 2**

0900	Guria	vs Lamana	WP
1100	Kumusi	vs A. Natuna	D3
1300	Quando Nemba	vs Muaiah Brothers	D2
1500	LBC Defence	vs Guria	D1

**bemobile  
PAINIM BAL RESIS!**



Putim mak (X) long wanem hap yu ting bal i stap long en na salim i kam long:

**Bemobile  
PAINIM BAL RESIS  
WANTOK NIUSPEPA  
P.O. Box 1982 Boroko,  
NCD  
Port Moresby.**

Bai yu gat sans long winim sampela gutpela prais i kam long Bemobile na K100 i kam long Wantok Niuspepa long wanwan mun.

Lo bilong resis: Ol wokmanmeri bilong Wantok Niuspepa no inap pilai long dispela resis. Wantok Niuspepa tasol bai i makim wina. Nogat potokopi. Taim bilong dro em bihain long foapela wik bai ol i droim wina na nupela pilai bai i stat gen. Nem bilong wina bai kamaut long pepa neks wik bihain long dro.

**bemobile WANTOK**

Nem:.....Krismas.....

Atres:.....

Phone namba:.....

**Yu baim pepa long we?**

Long stri/ rot/ stua:.....

Katim na salim i kam





GRUP FOTO: Ol sumatin i bung wantaim long wanpela skul we ol i lainim long pilai tenis.

# Tenis gro long PNG

Andrew Molen i raitim

TENIS (Tennis) em i wanpela spot we nogat planti manmeri long Papua Niugini save pilaim.

Sampela i save ting em i gem bilong ol manmeri bilong narapela kantri tasol.

Narapela as em long wanem dispela spot i no go aut tumas long ol manmeri insait long ol komyuniti olsem ol arapela spot.

Em i save stap tasol long ol bikpela taun na siti na planti ol program bilong en i save kamap long ol intanesenel skul na hai skul o long ol klap we planti ol manmeri bilong arapela kantri save stap o bung.

Tasol dispela tingting i wok long senis na planti moa manmeri long olgeta hap bilong komyuniti wok long lainim dispela spot.

PNG Tenis asosiesen (PNGTA) i wok go aut long ol komyuniti long wanwan provins dispela yia na skulim ol manmeri long spot bilong ol.

Ol i stat long Vanimo dispela yia na las wik ol i go long Kimbe na Hoskins long Wes Nu Briten provins.

PNGTA i mekim dispela program bilong ol wantaim



SANAP: Ol sumatin i sanap na mekim sampela pilai long lainim tenis. OL POTO: I kam long BSP.

bikpela sapot bilong BSP benk.

BSP i givim K150,000 long PNGTA long ronim dispela program na ol i kisim tu helpim bilong 35 han bilong BSP benk long wanwan provins long mekim wok bilong ol.

Tupela developmen opisa bilong PNGTA, Michael Foo na Lavu Ivuyo i wok long raun i go long ol skul long wanwan provins na givim trening na aweanes long ol sumatin long tenis.

Raun bilong Foo na Lavu i

go long WNB i bin statim namba tu hap bilong program bilong ol.

Long hap, ol i go long 8-pela skul insait long Kimbe taun na narapela 8-pela long Hoskins.

Inap olsem 2, 000 sumatin na tisa wantaim i bin kamap long dispela ol trening we i ron 5-pela de olgeta.

BSP Kimbe Brens Menesa, Misbil Alfred na Brens Trening Menesa, Emily Kaliop husat ol i makim olsem kepten bilong BSP tenis projek komiti givim bikpela helpim long ron-

im dispela program long hap.

Wanpela liklik pilai resis bin kamap long Sarere Oktoba 3 namel long ol skul.

Dispela i kamap long Hoskins sekenderi skul na i bin gutpela tru long lukim planti manmeri kamap long en.

Bihain long dispela, wanpela trening bilong ol trena i kamap.

Tenis em wanpela spot we tupela pilaia i save sanap long wanwan sait bilong net na paitim bal i go i kam wantaim wanpela samting ol i kolim

raket (racquet).

Raket i gat longpela han bilong man long holim na het bilong em i raunpela olsem plet na ol i save mekim wantaim stronpela plastic.

Sampela taim i save gat tupela pilaia long hapsait na tupela long narapela sait.

Pilaia long hapsait i save traim long paitim bal i go abrusim narapela pilaia hapsait long net.

Tenis i stat long Frans long ol yia insait long 1300. Ol i save kolim tenis olsem

paume we i min olsem han bilong wanem ol i save paitim bal wantaim han bilong ol nat-ing.

Ol i bin senisim nem bilong em i go long jeu de paume taim ol i stat long yusim ol raket long paitim bal.

Dispela gem i go olgeta hap long Yurop na long 1873, Mesa (Major) Walter Wingfield i kamap gem ol i kolim Sphairistikè we i min "pilai wantaim bal" long tokples Gris (Greece).

Long hap, dispela gem i senis i go na i kamap olsem tenis we yumi save long en tete.

Tenis nau i kamap olsem wanpela bikpela spot long graun we sampela ol biknem olsem Andre Agassi, Pete Sampras, Michael Chang, Stephie Graff, Serena na Venus Williams i save pilai.

PNG nogat ol pilaia i stap long dispela mak yet tasol i gat sampela ol pilaia olsem Abigail Tere Apisah na Nicole Angat husat i dai pinis, i save makim PNG long Pasifik gems na ol arapela intanesenel pilai.

Dispela kain aweanes PNGTA i mekim nau i ken helpim long strongim tenis insait long Papua Niugini na kisim moa manmeri long bihainim.



# bemobile KapiNius

## Mioks i kam long longpela rot

**Bustin Anzu i raitim**

**LONGPELA rot, planti hatwok, planti skin pen, planti kros pait tasol antap long dispela, ragbi lig i mas go yet.**

Dispela rait bai pinis nau wantaim bikpela gem bilong dispela resis long 2009.

Na tupela tim husat i daunim ol arapela long kamap long dispela de em Toyota Mioks bilong Wabag na Agmark Gurias bilong Rabaul.

Planti sapot bilong ragbi lig insait long kantri no ting olsem Mioks bai mekim i go insait long gren fainol bilong bemobile kap resis dispela yia.

I gat planti gutpela tim wantaim ol gutpela pilaia husat inap kamap long fainol tasol ol mangi longwe ples bilong Wabag i strong na kamap long hia.

Bihain long planti paitim tok i

kamap namel long ol pilaia na menesmen bilong klap, ol i bung na pilai gen long gutpela bilong ol na provins bilong ol.

Tasol wokabaut bilong ol long fainols dispela yia i no inap kamap tru sapos i no bin i gat dispela bikpela of sisen resis ol i kolim Coca Cola lpatas kap.

Long dispela pilai tasol na ol i painim ol gutpela pilaia long mekim na strongim tim bilong ol dispela sisen.

Planti ol arapela tim tu i kisim ol pilaia long dispela of sisen resis we planti makim kantri pinis.

Planti bilong ol Mioks i save stap long Wabag tasol na pilai.

Long lpatas kap tasol na olgeta pilaia i bung wantaim.

Ol pilaia olsem Mai Tom, Jerry Tapako na Jonah Mackay em bilong Lae siti na i save pilai wantaim Lae Bombers bipo.

Tasol Mioks i luksave long ol long lpatas kap na kisim ol.

Na man husat i gat bikpela laik na tingting long Mioks em Enga Gavana, Peter lpatas we dispela of sisen resis i stap aninit long nem bilong em.

Em i putim taim na mani bilong em yet long lukim olsem tim bilong em i go insait long fainols.

Olgeta ples pilai go long en, Gavana lpatas i save go raun wantaim tim long soim sapot bilong em.

Narapela man husat i helpim tu long stretim dispela Mioks tim em Timothy Lepa.

Em i bin gat ol krangi pasin bilong em yet tasol em i wokhat long ronim lpatas kap na painim ol gutpela pilaia bilong Mioks.

Mioks i luksave long wok bilong Lepa na i kisim em olsem menesa we i lukim em i go pas long painim ol pilaia na kosa bilong tim.



**WIN:** Wanpela Mioks pilaia i apim han bihain long ol i winim semi fainol las wik Sande agensim Lahanis long Mosbi. **POTO:** Andrew Molen.

Bipo Kumul na Hailans zon pilaia, John Passangan i no westim taim long bungim ol mangi long namba wan taim bilong pilai.

Tupela i ronim tim gut tru na i bin mekim gut long stat bilong raun insait long pions leda bilong bemobile kap.

Tasol long namel bilong sisen, bod bilong Mioks i rausim Lepa na Passangan bihain long sampela paul pasin bilong tupela i kamap.

Sampela pilaia i bin laik bihainim ol na lusim tim tasol ol i no bin mekim.

Bod i kisim olupela kosa, Toksy Nema i kam bek long kisim tim long

ol gem i stap yet.

Nema i no nupela long ronim dispela tim na ino westim taim long apim gem bilong tim bilong em taim ol i givim em bek olupela wok bilong em.

Ol Gurias tu i kisim sampela gutpela pilaia long of sisen na hat wok bilong ol long dispela sisen i kisim ol i kam long bikpela gem nau.

Tingting bilong ol i pas long winim dispela taitol tasol ol Mioks i tok olsem ol tu i redi long bungim ol mangi Tolai.

## Strong bilong Gurias

**Bustin Anzu i raitim**

**STRONG** bilong ol Gurias i stap long olgeta gutpela pilaia insait long Niugini Ailans (NGI) rijen.

Dispela em bilong wanem Gurias em wanpela tim tasol bilong NGI na i gat sans long kisim ol pilaia bilong olgeta ragbi lig resis long dispela hap bilong kantri.

Ol i ken lukluk i go insait long ol arapela provins long mama graun PNG tu long kisim sampela ol pilaia long hap.

Gutpela wok bilong ol long kisim sampela ol nupela gutpela pilaia i go insait long tim i helpim ol dispela yia long kam bek strong insait long bemobile kap resis.

Bihain long ol hevi bilong ol long stap insait long gren fainol, ol i kisim sampela ol gutpela pilaia bilong ol arapela asosiesen i kam insait long tim bilong ol.

Na bekim bilong dispela i wok long karim kaikai nau long gem bilong.

Tupela pilaia ol i kisim na lainim long gutpela pasin na laipstail bilong pilai ragbi em Charlie Wabo na Menzie Yere.

Tasol tupela bai no inap pilai long gren fainol dispela Sande bilong wanem ol i stap pilai long Inglen (England) dispela sisen.

Mangi Tari, Larsen Marabe na Kumul fowet bilong Hagen, Rodney Pora, em sampela ol pilaia husat i strongim Gurias tim.

Bipo ol i save kisim ol pilaia i kam long NGI olsem Kavieng, Kimbe na Bogenvil tasol dispela



**STRONG:** Marabe em wanpela strongpela pilaia bilong Gurias. **POTO:** Andrew Molen.

i senis taim Agmark i kamap mama sponsa na i ol i stat lukluk long ol pilaia bilong arapela rijen tu olsem long Hailans long strongim tim bilong ol.

Na taim bipo huka, Michael Marum i kamap kosa na narapela bipo Kumul, Ted Vere i kamap menesa, Gurias i mekim nois gen.

Narapela strong bilong ol long win em asples pilai graun bilong ol, Kalabond long Kokopo.

Dispela pilai graun i kamap olsem matmat bilong ol arapela

tim husat i go pilai long hap bilong wanem i nogat wanpela i winim Gurias long hap dispela yia.

Ol win bilong Gurias long Kalabond i helpim ol i kisim planti poin dispela yia long go insait long gren fainol.

Ol i winim Bintangor Lahanis 25-24 long namba wan semi fainol resis insait long ekstra taim long Oktoba long Mosbi.

Ol bai bungim Toyota Mioks dispela Sande long gren fainol long Mosbi.

## Lewa bilong Hukula i bruk

**Andrew Molen i raitim**

**DISPELA** yia em i namba wan taim bilong Bintangor Lahanis kepten, Nigel Hukula, long kisim ol i go long fainol, tasol em i no laki yet long go insait na winim gren fainol.

Ol i lus long Toyota Mioks 18-10, insait long wanpela strongpela gem.

"Ol mangi traim hat tru tasol mipela i no bin inap long win," em i tok.

"Long stat bilong dispela yia, mipela i no bin i gat sans long kam olgeta long fainol olsem tasol ol mangi wokhat na mipela i kam,"

Hukula i tok.

Long 2005 ol i bin go long gren fainol tasol i lus long Agmark Gurias.

Las yia ol i go long semi fainol olsem nau tasol i bin lus long Bintangor Eagles.

Nau ol i traim gen tasol i pundaun sot long han bilong ol Mioks.

"Mi amamas long ol mangi, ol i sanap strong hia tete na pait tasol ekspiriens bilong ol Mioks i antap moa long mipela.

"Lewa blo mi bruk stret long dispela lus," Hukula i tok.



**TRAIM HAT:** Hukula i traim hat tasol i no nap winim gren fainol bilong Lahanis yet. **POTO:** Andrew Molen.



# Makim PNG gems long AIDS aweanes

Andrew Molen i raitim

I GAT bikpela wok bilong skulim ol manmeri wantaim spots we bai kamap long PNG gems long Mosbi long Novemba dispela yia.

Komiti bilong yusim spots long stopim sik HIV AIDS (Committee on HIV Prevention Through Sport) bai go pas long dispela wok.

Ol bai putim ol askim long pepa na givim i go aut long ol manmeri long pilai graun long painim aut hamas samting ol i save long sik AIDS.

"Mipela i makim dispela 210 na moa pilaia

na etlit husat bai kam na tu ol manmeri husat bai stap long hap long dispela taim," Projek Menesa, Barbara Kassman i tok.

Ol arapela wok bilong yusim spot long skulim ol manmeri long sik AIDS bai kamap yet.

"Mipela i putim inap olsem K18, 000 long putim ol toksave bilong AIDS long yunifom bilong ol Australia na PNG Praim Ministas 13 tim long Septemba," Loreta Hasu bilong komiti tu i tok.

Komiti bin kisim helpim bilong Trukai Industries husat ol i givim 125, 000

fan ran (Fun Run) siot we i gat toksave bilong HIV AIDS i stap long ol tu long.

Dispela ol siot i kam wantaim ol liklik kad wantaim ol nem na namba bilong ol ples we ol manmeri ken i go long kisim fri HIV tes.

Hasu i tok nau yet ol i nogat namba o bekim bilong ol manmeri long wanem kain gutpela samting i kamap long wok bilong komiti taim em i stat long 2007 i kam inap nau.

Kassman i tok dispela ol askim we ol bai givim aut bai helpim ol long kisim bekim bilong

ol manmeri.

"Dispela bai soim mipela long wanem ol eria mipela i mas makim long givim aweanes bilong mipela," em i tok.

Sekreteri jenerel bilong PNG Sports Federation na Olympic Committee (PNGSFOC), Sir John Dawanicura i tok i gat planti arapela wok ol bai kamapim long dispela.

Em i tok ol bai givim aut tu ol tul kit (tool kit) o sampela ol samting bilong helpim ol manmeri save moa long sik AIDS na tu long yusim long was na helpim ol yet.

Wok bilong komiti kisim gutpela sapot bilong

PNG Sports Foundation (PNGSF) husat ol i givim K660, 000 dispela wik Tunde long ol.

"Mipela i amamas long wok bilong komiti na bai sapotim ol yet," Sif Eksekutiv Opisa (CEO) bilong PNGSF, lammo Launa i tok.

Dispela mani PNGSF i givim bai kisim total bilong mani ol i givim ol i go inap long K280, 145.

Launa i tok ol i mas wokbung wantaim olgeta manmeri, gavman na ol bisnis long yusim dispela PNG gems long skulim ol manmeri na tu senisim pasin bilong ol long sik AIDS.

## Wet lifting rot bilong komonwelt gems

Andrew Molen i raitim

TRIPLEA man na tripela meri bai statim rot bilong ol i go long komonwelt gems long pinis bilong dispela mun.

Komonwelt gems bai kamap long Oktoba 2010 long India na wokabaut bilong ol dispela Papua Niugini etlit bai stat long Oktoba 18 dispela yia.

Steven Kari (62kg), Moses Wak (56kg) na Morea Baru (69kg) bilong ol man wantaim Rita Kari (58kg), Kathleen Hare (48kg) na Guba Hale (69kg) bai makim PNG long komonwelt sempionsip long Oktoba 18 i go long 23 dispela yia.

Long ol man, (Steven) Kari bai pilai long junia divisen na long ol meri, sista bilong em, Rita bai pilai long Junia divisen.



**TIM:** Ol yangpela wetlifita bilong PNG husat bai kantri long komenwelt sempionsip dispela mun. **POTO:** Andrew Molen.

Dispela em bilong ol lain i gat 18 i go long 22 krismas – Steven em 16 krismas tasol.

Narapela 4-pela bai resis long sinia divisen, dispela em ol 23 krismas i go antap.

Sekreteri jenerel bilong PNG Sports Federation na Olympic

Committee (PNGSFOC), Sir John Dawanicura i tok ol i no askim bikpela samting long ol dispela pilaia.

"Mipela i laikim tasol bai ol i pilai wantaim olgeta save na strong bilong ol.

"Sapos yupela i mekim gut bai yupela i ken

winim sampela medol, sapos nogat bai yupela i ken brukim sampela rekot bilong PNG na Saut Pasifik," Sir John i tok.

Mea Willie husat i makim mama spona bilong tim, Trukai Industries i tok bikpela sapot bilong ol tu i stap

wantaim tim.

Kosa, Douglas Mea i tok trening bilong ol i ron gut na ol i redi long givim strongpela salens long dispela sempionsip.

Tim menesa Frank Robby i tok Dika Toua i no stap insait long dispela tim bilong wanem em i kisim malolo long trening na pilai.

"Dika em i man olsem yumi olgeta olsem na em tu i mas kisim malolo liklik.

"Tasol mipela bai pusim em i go insait gen long Osenia sempionsip we bai kamap bihain, long redi long komonwelt gems," Robby i tok.

Sir John i tok, Toua em i nupela mama tu na i mas gat taim long lukautim pikinini bilong em na tu stap wantaim femili bilong em bipo em i go bek pilai gen.

## Liklik sempion

Andrew Molen i raitim

DISPELA em namba wan yia bilong Esther Metlem long pilai soka tasol em i soim olsem em i gutpela long dispela spot.

Metlem, 13 krismas, i save pilai straika bilong anda 13 tim bilong skul bilong em, St Pauls praimer skul long Gerehu, Mosbi.

Tim bilong em i save pilai insait long skul soka resis bilong Gerehu kantri soka husat ol i hap han bilong Mosbi soka asosiesen.

Em i kisim luksave

olsem namba wan pilaia insait long presidens kap resis we i pinis las wik.

Metlem i save putim wan o tupela gol long olgeta gem ol i pilai na long dispela tonamen em i putim gol long winim semi fainol gem bilong em na i skoa gen long gren fainol long win.

Gutpela pilai bilong Metlem i winim sapot bilong ol arapela wan-pilai na poro bilong em.

Ol i makim em tu olsem kepten bilong tim.

Tonamen i pinis na ol i go bek long skul soka resis bilong ol gen.

Metlem i laik pilai gut

na mekim kantri bilong em bihain taim.

Mama papa bilong em i amamas long pilai bilong Esther na i tok ol bai sapotim em long gem bilong em.

"Tasol mi laikim tu bai em i mas skul gut na pinisim olgeta skul wok bipo em i go pilai," papa bilong Esther, Daniel Metlem i tok.

Mama bilong Esther, Mary i tok Esther i wanpela meri bilong pilai stret taim em i liklik yet.

"Mipela i amamas stret long em," Mary i tok.



**TROFI:** Esther Metlem na mama bilong em, Mary wantaim trofi bilong namba wan pilaia we Esther i winim long tonamen. **POTO:** Andrew Molen.

SPOT RAUN  
WANTAIM  
Scott Vavine, ML



## PNG Gems em wanpela rot bilong go long 2015 Pasifik gems

AS bilong PNG Spots Komisin (nau PNG Spots Faundesen) long kamapim PNG Gems long 2003 em long givim moa luksave long ol grasruts spots manmeri.

Nau i gat klostu olsem 5-pela moa yia i stap bipo Pasifik gems bai kam bek hia long PNG na i nogat planti taim moa i stap long redi.

Ol wok bilong mekim ol haus na pilai graun bai kamap tasol ol wok bilong luksave long ol gutpela spotsmanmeri na trenim na redim ol tu i mas kamap.

Olgeta hap bilong komuniti mas bung wantaim long lukim olsem ol gutpela spotsmanmeri bilong ol i kisim luksave na gutpela wok developmen long trening bilong ol.

PNG Sports Foundation (PNGSF) wantaim PNG Spots Federesen na Olimpik Komiti (PNGSFOC) wantaim ol spona na arapela wanwok bilong ol i mas wokbung nau long lukim dispela i kamap.

Wanpela gutpela hap we ol i ken painim ol dispela spotsmanmeri em long PNG gems we ol pilaia i save kam long 20 provins bilong kantri.

Ol provins i mekim bikpela wok pinis long painim dispela ol etlit na kisim ol i kam pilai, nau em i wok bilong ol nesenel spots ogenaiesen olsem PNGSFOC na PNGSF long luksave na kisim dispela ol etlit husat i kamap ples long dispela ol gem.

Wanpela asua mi save lukim em, ol dispela nesenel spots ogenaiesen i save lukluk tumas long ol nesenel na klap sempion bilong ol na i no save lukluk long ol grasruts tu.

I nogat samting krangki long ol i mekim dispela tasol ol i ken painim planti moa long ol gutpela spotsmanmeri tu sapos ol i lukluk tu long ol arapela ples.

Long Novemba bai namba 4 PNG gems i kamap long Mosbi na em i sans bilong olgeta spots ogenaiesen long putim ai long ol gutpela pilaia.

Tingim, ol i mas mekim dispela wok nau na i no bihain.

Sanap bilong PNG insait long Osenia rijen i go daun tru na ol kisim i kam bek antap i mas lukim planti risos tru i go insait long mekim kamap.


Mi laik askim olgeta nesenel federesen bilong wanwan spot long stretim ol hevi bilong ol na wokbung wantaim long mekim dispela i kamap.

Helpim long apim level bilong PNG go antap gen.

Em i wok bilong yu long painim ol risos na samting bilong mekim dispela i kamap.


Bikpela luksave bilong kantri bai stap long wanem wok yu mekim long painim na redim gut ol etlit bilong yu nau.

Yu mas soim gavman na ol bisnis na spona olsem yu min tru long mekim wanpela gutpela samting long dispela 2015 Pasifik gems we bai kam long hia.



WANTOK

# SPOOTS



Isu 1836

Wan wik Fonde: Oktoba 15-21, 2009.

MAKIM: David Loko i makim birua bilong em long gem las wik Sande.

# Mioks redi

## Kosa bilip long winim Gurias

Andrew Molen i raitim

**KOSA** bilong Toyota Mioks, Toksy Nema, i tok ol i redi long bungim Agmark Gurias long bemobile kap gren fainol dispela Sande long Mosbi.

Em i toktok wantaim bikipela bilip long tim bilong em bihain long 18-10 win bilong ol agen-sim Bintangor Lahanis long Mosbi las wik Sande.

"Mi ken tok nau olsem mi redi long kisim tim i go long gren fainol," Nema i tok.

Em i amamas long pilai bilong tim bilong em husat ol i holim strong long namba tu hap bilong gem taim ol Lahanis i wok long kam bek strong.

"Mi amamas long ol mangi bilong mi bilong wanem ol i pilaim strongpela gem tru.

"Mi laik tok amamas tu long ol Lahanis long ol i wokhat na i kam hia long f a i n o l s t e t e," Nema i tok.

Nema i tok difens bilong ol i

bin strong tru na dispela i helpim ol long pasim ol Lahanis long skoa.

Mioks i pilaim nupela kain gem we ol i no bin pilaim long namba wan hap bilong dispela sisen.

Ol i tromoi bal i go i kam moa we i lukim planti ol trai bilong ol i kamap long sait we ol spit man long beklain bilong ol i save ron.

Ol Gurias tu i kisim sampela gutpela pilai long of sisen na hat wok bilong ol long dispela sisen i kisim ol i kam long bikipela gem nau.

Tingting bilong ol i pas long winim dispela taitol tasol ol Mioks i tok olsem ol tu i redi long bungim ol mangi Tolai.

Dispela kain pilai em i wankain olsem pilai bilong ol Gurias.

Tasol bikipela wok bai kamap yet long namel bilong fil wantaim ol fowet.

Ol i mas kisim bai i go antap strong na mekim rot bilong ol beks long ron.

Sapos tupela tim wantaim i pilai olsem long Sande

em bai gem i spit tru, dispela em we tim i gat gutpela difens tru bai gat sans long win.

Ol Gurias i nogat gem las wik na ol i bin malolo gut.

Kosa Michael Marum i tok las wik olsem ol bai yusim dispela taim long stretim ol liklik asua insait long gem bilong ol.

Mioks i nogat malolo tasol swit bilong win las wik i stap yet long tingting bilong ol na dispela inap strongim ol.

Nema i no wari long kisim malolo na i tok; "Mipela bai redi long ol taim ol i kam."

Mioks i bin bungim sampela hevi namel long yia we i lukim ol i rausim olupela kosa, John Passingan na tim menesa, Timothy Lepa na Nema i kam bek long lukautim tim.

Nema i no nupela long ronim dispela tim na i no westim taim long apim gem bilong tim taim ol i givim em bek olupela wok bilong em.

Taim em i kam bek, Nema i kisim dispela stail pilai tu i

kam we ol i bi-hainim nau.

"Dispela em wanpela samting mi lukluk long en na yusim long trening wantaim ol mangi.

"Em i gutpela long lukim olsem dispela i wok gut insait long gem tu," Nema i tok.

Mioks i putim 4-pela trai tasol wanpela kik tasol i bin go insait.

Lahanis i bekim tupela trai na wanpela kik tasol bilong ol tu i go insait.

Mioks i go pas 14-6 long hap taim bipo Lahanis i kam bek strong long kisim skoa i go 10-14.

Laspela trai na strongpela banis bilong Mioks i kisim ol i go 18-10 we ol i stap olsem inap ful taim.



PHOTO: ANDREW MOLEN.

**INSAIT:** ■ Makim PNG gems long AIDS aweanes. Pes 27. ■ Tenis gro long PNG - laipstail. Pes 26.

## Mitsubishi FUSO Rosa Bus

Engine upgraded  
130 Hp  
4 cylinder diesel

Dispela em spesol offer  
wantaim limited units  
istap lo olgeta hap  
long kantri

**K125,000**  
draiv awei

Act nau na kam lukim  
Boroko Motors dealership

offer bai pinis  
30th November 2009  
or inap stock i pinis

PORT MORESBY Ph: 325 5255 LAE Ph: 472 1144 MT HAGEN Ph: 542 1933 RABAU Ph: 982 8193  
KIMBE Ph: 983 5035 TABUBIL Ph: 548 9048 MADANG Ph: 852 2659

Email: info@borokomotors.com.pg  
Website: www.borokomotors.com.pg